

*ASO TOFI, 29 IUNI 2023*

*Na toe amatalia Taualumaga a le Fono Aoaofaitulafono i le itula e 2:00 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoaofaitulafono.

Faamalo le onosai i le paia o le Palemene, o lea ua taliu mai le taligasua o le aoauli, e manatu foi ua maua se isi malosi faaopoopo e faaauau ai pea le tatou galuega.

E faataatiaese tatou Taualumaga mo le malologa ua lamalama faaiu le Saunoaga Talifuaitau a le Afioga i le Minisita o Leoleo ma Falepuipui ma le Toefuataiga.

O le mea lea ou te tapa ma le faaaloalo lau Afioga i le Minisita e tulai mai e faaauau lau saunoaga.

**Afioga Hon FAUALO HARRY JEFFREY SCHUSTER:** Faafetai tele lau Afioga i le Fofoga Fetalai, faafetai tele foi lau Afioga ma le Matagaluega mo le taumafataga matagofie, ia ua maua ai foi le malosi e faaauau atu a e tau taeao.

**Afioga Laumatiamanu Ringo M Purcell (Safata 2):** Lau Afioga pe maua se avanoa.

**FOFOGA FETALAI:** Ia malie lau Afioga i le Minisita se i tuu atu le avanoa i le sui usufono o Safata 2.

Ia saunoa lau Afioga i le Minisita Lagolago.

**Afioga Laumatiamanu Ringo M Purcell:** Faafetai ua saialo le taumafataga o lenei aoauli, ae manatu o lea ua tau faaiuiu le saunoaga a le Minisita o Leoleo ma Falepuipui. Na o se mea e fia faasao i lana saunoaga e faapea mai na ou faamavae lava ua leva ona sola Chong Nee. Na ou faamavae i le 2006, o Chong Nee faatoa sola nei i le 2018 lau Afioga. E mate

o ese a ma le e Fofoga Fetalai e le i taitai ona sola Chong Nee. Mo faamaumauga a le tatou Maota Fono. Ma le faaaloalo.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, pe maua se avanoa e faasaoina le taimi o le Afioga i le Minisita.

**FOFOGA FETALAI:** E agai i le pagota lea, ia saunoa lau Afioga i le sui usufono mamalu.

**Afioga Sulamanaia Fetaiai Tauiliili Tuivasa:** Leai e agai a i mea sa ou lauga ai. E momoli le agaga faafetai i lau Afioga i le Fofoga Fetalai, ua tali foi le sua ma taumamafa lenei Maota i lau Matagaluega foi po o lou Ofisa, e momoli le agaga faafetai. Ae o le sui lenei ona o lea e matau atu o le a lamalama faaiu le saunoaga a le Minisita. E momoli le agaga faafetai i lau Afioga i le Minisita e le gata o lau Susuga o le Loia sa avea foi lau Susuga ma Faamasino, a o lea foi ua avea lau Susuga ma Afioga i le Minisita. E mimita ai a le sui o Vaimauga leaga o lea e numera 1 lea ma le numera 2 lea ae numera 3 ma le numera 4 na e i ina i lena itu.

Sa ou taua i lau lauga tulaga i totogi faafetai o lea ua afea, ae o le fesili sa tuuina atu ona o lea foi na e saunoa malamalama i le tele o osofaiga o loo faatino. O le tuualalo lea na avatu ni insure a nai Leoleo ona e le o po se lilo. Faafetai lava i si o tatou atunuu o lo o atu Leoleo o lo o faatino ma agalelei ifo i ai le Pulega a Alii ma Faipule ae iai a le taimi e faapena ai ona osofaia foi ma maimau ai le soifua ia ni insure. E le gata i Leoleo ma tulaga faatinoina a o e foi o lo o galulue Fuimu e tele a le tulaga aafia o latou o le Fuimu, e faapena foi latou o loo faatinoina le vaaiga o Pagota.

E faafetai ai foi i nei tamalii ma alo o fanau o le atunuu, o le isi taimi ta te fefe pe a vaai ae faafetai ia i latou o lo o galulue i le vaaiga o nei tagata ua tuuina atu. O le tatalo lena e tuuina atu i ni insure faafetai o lea ua e saunoa mai i totogi o nai... E pei o le lagona sa iai pei o lea foi ua e saunoa malamalama e maualuga totogi o le Falepuipui nai lo o Leoleo, ae pei o le tuualalo lena o Leoleo e pei tatau a ona maualuga e fia o uma a tagata e leoleo. E pei o le isi mea o Leoleo lea sa i ai e pei ua agai ifo i le Fuimu, po o ua toe agai foi i o i le Falepuipui ona e tetele totogi. E pei la o se tatalo pe mafai ona silasila ane.

Lua, sa taua i lau lauga le mea lea ua faafetai i le eleele lea ua faamatuu atu e le MNRE mo Vaimauga a o lea ua e saunoa la ua i ai. Ae o le tatalo ona o lea foi ua silasila o lea ua tatala le tatou malaevaalele i Fagalii, e faafaigofie ai, e le gata i le i ai o nai Leoleo i ina e faigofie ona omai e tiute i Fagalii, a o le i ai foi o se Fuimu ua tele ia maota ma laoa o e o loo agai atu ma nonofo i eleele ia tau o Maugafiafia faatau atu ai latou Fanua ona o le malupuipua i Pulega a Alii ma Faipule o le Fuimu.

Ae pei o le agaga lena e tuuina atu ina ia mafai ona faatino lena auaunaga, e tautua ai e foi o agai atu ma afifio ma alaala foi i eleele o lenei Itumalo e ala i le eleele lea o Muagafiafia.

Ia na pau lena o sina mea e faamanatu atu i le Afioga i le Minisita ae le i faamaea lana saunoga i lau Afioga i le Fofoga Fetalai. Ma lou faaaloalo lava.

**FOFOGA FETALAI:** Ia, se i tulai mai lau Afioga i le Minisita.

**Afioga Hon FAUALO HARRY JEFFREY SCHUSTER:** Faafetai lau Afioga i le Fofoga Fetalai. O le saunoaga a le Afioga i le sui mamalu mo Safata 2, e faamalulu atu i lau Afioga, faafoi mai se tala ua sese atu foi ia oe, ou te mulimuli a i le faiaoga sa ou aoga ai, fai mai aua e te faia se tala e tiga ai se loto o se isi. E faamalie atu pe afai ua tiga ai lou loto i lau faamatalaga.

Lau Afioga i le sui mamalu mo Vaimauga 1, e faamauina le tulaga lea ma na talanoaina foi e le Komesina o Leoleo ma le Komesina o Fuimu fuafuaga agai luma a le Matagaluega le tulaga lea i le fanua lea na faamatuu mai e le Matagaluega o le MNRE e fuafua mo se fale tineimu ma se auaunaga a Leoleo i le vaega lea o le Vaimauga ona ua faateleina foi numera o lo o i ai i ina. Ae o le tulaga lea ona lea ua i ai le malaevaalele i Fagalii, e i ai a le tulaga masani e i ai a le tiute a Leoleo i le malaevaalele faapea foi la ma le taavale Fuimu e tatau ona i ai. O la ua atofa e le Matagaluega auaunaga masani mo ia tulaga.

O le tulaga i le insure lea foi sa laga mai e le sui o Safata 2. E moni le faamatalaga i auaunaga aemaise auaunaga ia Leoleo ma le Fuimu, e i ai le avanoa ona o le natura o tiute ma auaunaga lautele, e i ai le avanoa e mafai ona sau i le taeao e faigaluega ae le foi i le afiafi. E taua la le tulaga lea i le insure ae sa faamauina sa talanoaina muamua foi ae taatia mai se i faatalanoa foi i Vaega foi o le Malo e gafa ma le tulaga lea faapea ma le Matagaluega o Tupe i se tulaga agai i luma ae faafetai tele mo le faamanatu mai.

Lau Afioga i le Fofoga Fetalai pei o le vaega mulimuli sa fia taua i fesili sa laga mai, o le faamauina lea o finagalo o sui mamalu i auala foi ua popoto foi le au solitulafono e nana mo fualaau faasaina o totonu o mea ia o tooth paste, o suauu ma tulaga faapena. O le tala fiafia lau Afioga o nei le taeao na matou fonu ai ma le Matagaluega ma le sui mai le Malo o Amerika faapea foi le auaunaga a le Malo o Ausetalia le AFD o lo o i ai nei. O Tutuila o lo o maua uma masini foi ia e mafai e latou vaega ia Customs ma Leoleo i le malaevaalele ma le uafu ona a masalomia se mea ona liligi lea i totonu o le masini lea, ona tauina mai lea e le masini e sao o lea e i ai le fualaau faasaina.

E le i oo la tatou i le tulaga lea a o lea ua faatalanoaina le fesoasoani mai isi vaega la tatou faipaaga e maua mai ai se fesoasoani i le tulaga lea. Ia ma le tulaga foi la e au manaomia a taifau i o le malaevaalele ma le uafu mo Leoleo, ae faamauina le manatu uma o sui usufono na faaalua i le tulaga lea. I le mamalu o le Fono ou te matauina ia Matagaluega o lo o ou galue ai e

taumafai a le mea e gata ai le taumafai ma le Tulafono. Ae i ai a le lape e faamalulu atu pe a ua le au le auunaga a le Matagaluega i tulaga o la e manao e au iai.

E taumafai a le mea e gata ai le taumafai, e avea foi manatu faaalua e tulei ai foi ma uunaia ai le mamalu o le aufaigaluega ia oo le auunaga i tulaga lea e saunoa ai sui ia tineia le faaletonu lea i ai, aemaise a tulaga o le mea tau fualaau faasaina. E faamalie atu foi i le mamalu o le Fono pe a ua i ai se tala po o se aga ua sese ai le tautalaga i lenei aso.

Lau Afioga i le Fofoga Fetalai, e fia pai atu a i si o matou Itumalo o Vaimauga 4 i le Paia o Alo o Sina, Fuaifale o Salevalasi, le Faletolu ma le Vainalelepa ma le Matua ia Faaolesa ma Onofiatele ma upu ia oe Tuisamau. Faafetai tele atu lava i Pulega Mamalu a Alii ma Faipule. O si o matou Itumalo e 26 pitonuu, a ua vaevaeina i faiganuu e 9, e pei a o le Nuu Mavae o Apia ma Alamagoto ma Faiganuu ia faataatia mai e le Matagalue o Tina ma Tamaitai, lea ua vaevaeina ai i le 9 lea la ua faaoga ai i le matou poloketi.

Faafetai atu lava i le Pulega Mamalu a Alii ma Faipule o tatou faiganuu uma ia e 9, faafetai le lagolago, faafetai foi le fesoasoani mai i le faatinoga o le tatou Poloketi lea mo le miliona. E momoli atu le faafetai i sui uma o pitonuu ia e 9 i totonu o le Komiti Faavae, faapea Sui Tamaitai o Sui o le Malo ma Komiti taitasi a Pitonuu ia e 9 mo le galuega mo le tapenaga matagofie na outou faia. E le i maua se tatou aufaigaluega i le taimi sa taumafai ai ae sa fai a e outou le galuega o le faamaopopoina o poloketi a le Itumalo ma feiloai ma le Matagaluega. Malo mo le galuega maeaea, malo le tapena.

O le tala fiafia o lea na maua mai le tala ua talia atoatoa e le Matagaluega ma le Komiti o lo o faafoeina ma pulea le avatu o le ioe ma le leai i se Itumalo, ua latou talia le tatou tala o le tupe mo le \$425 afe lea na aumai muamua. Ou te iloa o se taimi lata mai ona maua lea o se avanoa e avatu ai le isi \$425 afe, ae pei ona tatou galulue i le taimi ua tea atu. Tatou tapena mo le faaogaina o le isi \$425 afe lea ua tapena mai, ia faaoga ae le i oo atu ia Tesema.

Lau Afioga i le Fofoga Fetalai, na o se tala i le poloketi lea e momoli ai le faafetai i le Afioga i le Minisita o loo vaavaaia le poloketi lea ma le Komiti. Ia au a ia faa-sui usufono o le Vaimauga 4 e fiafia ia i lau vaai i le poloketi lea, e le gata o le fesoasoani i tagata o le Itumalo a o le mea pitosili ona ou fiafia i ai, e fai a e tagata o le Itumalo ia le tonu o le mea e mananao ai latou. E le o se faaiuga e fai atu e se Matagaluega pe fai e le Faigamalo, fai a e le Itumalo ia le tonu. Ma o le manaia foi o le mea lea a pakalu e leai a se isi e tuuaia e tuuai a i le Itumalo ma latou Komiti o le Itumalo. O le mea la lea e momoli atu ai le faafetai tele lau Afioga i le Minisita mo le miliona ma o le a taumafai e faauma le miliona muamua ae faasolo atu i le miliona lona 2. E faafetai tele atu ai i le mamalu o le tatou Itumalo.

Lau Afioga i le Fofoga Fetalai, ia alofagia e le Atua lau Afioga, manuia le Afioga i le Tamaitai Palemia, Sui Palemia ma le Kapeneta ma le mamalu uma o sui usufono o le Maota Fono o Samoa. Alofagia foi ia Ofisa Sili o Pulega o Matagaluega a le Malo ma Faalapotopotoga Tumaoti a le Malo. Alofagia foi e le Silisili Ese ia Samoa uma, Samoa iinei i Samoa ma Samoa foi o lo o aumau, tatalo ma tapuai mai mo le tatou atunuu i atunuu mamao. Faafetai tele lau Afioga mo lou avanoa.

**FOFOGA FETALAI:** Ua faamalo saunoa, i le tulai ai foi o lau Afioga i le Minisita o Leoleo aemaise foi le Ola Toefuataina ma le Tineimu ma galuega Laveai aemaise foi le Ofisa o le Komesina o Faigapalota. Faafetai mo le faamalamalama tele foi o nisi o finagalo sa faaalua e le tatou Maota. Ia malo mo le faasoa aemaise foi o le faamalamalamaina o nisi foi o mataupu sa faanefu foi i le faafofogaaga a le Maota aemaise foi o le atunuu. Malo a faafetai lea ua manino mea uma i le saunoaga a lau Afioga i le Minisita malo lava.

Ia ua oo mai le tatou faasologa i lau Afioga i le Minisita o le Soifua Maloloina aemaise foi le tatou Vaega o Fatugao ma le Iunivesite o le OUM - Oceania University of Medicine. Ia lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai tele lau Afioga i le Fofoga Fetalai. A o le i faia se tala e muamua ona ou afe atu i lau Matagaluega, lau Afioga i au Sui Minisita faapea foi le Tama Matua Tea aemaise foi le Tofa ia Foisala. Ia o mea mea masani, tapuai maia ma le manuia. E le faagaloina le tapuaiga a le Ofisa Sili o Pulega le Afioga le Laaunafausia, Afioga Aiono ma le Pulega, Matagaluega e oo lava i se aupito iti aemaise o Falemai Tumaoti i tua o tatou Itumalo o fea lava le mea o faalogologo mai ia. Ia, tapuai maia o le lauga lea a le tatou Matagaluega. O le a sii le vaa o le Matagaluega i tai ina ia faagotaina le gataifale, o le a se mea maua e toe afe atu mo le tapuaiga. Ia tapuai mai.

Lau Afioga i le Fofoga Fetalai ma le mamalu o lenei Maota mamalu, e muamua ona ou faafetai atu i lau Afioga i le vaaiga i suiga fou. E matauina ina ua foi mai se faigamalaga i le mamalu o le amata i le Sauniga i le Atua faaatoa afio mai ai le... susu mai ai le Satini ma le Agai ona amata lea o le tatou ese le manaia, ma o le mamalu ua matauina. Faafetai le tofa faafetai i le Agai o le Maota, faafetai mo lou siufofoga. O le tatalo ia faatupuina e le Atua le manaia ma le matagofie o lou fofoga, e ese ai a Samoa ma lana Palemene pe a e lagiina le tulaga o lau taulaga aua le amatalia o le fonotaga, malo faafetai.

Sa ou tatalo i le Minisita i fafo ia sii ia lelei lou totogi ma lau alauni, leaga e le faigofie le alu atu o le leo, siufofoga. Faafetai i le Satini, ua mamalu mea uma. Faafetai faamalo i le Failautusi ma le Pulega.

Ou te le toe oo i mamalu o Samoa lau Afioga i le Fofoga Fetalai aua o upu masani, o Samoa a ia o le atunuu ua tofi ma e le toe i ai se poto e toe mafai ona toe auatalaina pe suia ona upu. Faafofoga Samoa, faamanuia le Atua i le tapuaiga aemaise le tatou Malo, aemaise o Faauluuluga foi ma le tapuaiga a Ekalesia. Ia na ona ou faapena atu. O le a ou le talatalaina le lavelave a o mamalu e tumau e oo lava i le faavavau.

Le tapuaiga foi a Ofisa Sili o Pulega ua matagofie. Faafetai tele, ua mapo le fono aemaise o outou e tua i ai le upu ma le tala e vae ma lima i ai le Malo i ona faiva alofilima. Sa tau tomanatu i se lauga e ono lauga ai le Matagaluega aua ua alu mai lava i taimi o ou i fafo, sa ou faalogo mai ma ou matauina le tele o fetusiaiga, le tele o tala, le tele o manatu ma lagona o le atunuu, aemaise foi ina ua taunuu i felafolafoaiga o le Maota lenei, i le tele o mea sa laga e uiga lava i le Matagaluega o le Soifua Maloloina. O lona uiga e le faigofie le ala, e le se ala malu ona ou tomanatu lea i sailigamalo a Malietoa ma Sua, na fia taunuu i se ala filemu e le Taimaitai o Nafanua.

Fai mai na saili se ala e le maua, ona o lea taunuu ia Lagaia, se i tulou, e le o Lagaia lea le sui usufono. O Lagaia e i ai lana manu e vavalo sa talosaga i ai Malietoa ma Sua pe faapefea ona maua se ala filemu i taimi ia faatoa inu a Malietoa i le po ma malolo, maua lona Suafa... Malietoa Vainuupo faatoa inu ma ai i le po, sau i aso uma ma taimi uma ona faalele lea o le manu a le tamaloa Palauli toe lele mai, toe alu i le itu i Sasae ma Sisifo ona utu lea i Sisifo. Fai mai Lagaia, o le ala filemu e leai se fili o Sisifo. Na ui i ai le faigamalaga na taunuu manuia.

O le tala ua iloga ma tala o Samoa, e faapena se lagona o le Minisita o le Soifua Maloloina na saili se ala filemu pe faapei ona asa le tulaga faigata o le Matagaluega i le vaai ma le silasila a Samoa. Ona ou manatu lea ua na o le Atua le ala filemu, ua na o le Atua e faasinoala, na o le Atua e aumaia le tonu ma le sao e faasino le mea e ao ona fai. Na ou tomanatu lea i le Maota lenei, o le Maota o sui mamalu, sui filifilia ma e pei ona taua e le Tamaitai Palemia ma nisi o sui o le Maota o Matai.

Pau lenei o le atunuu e le mafai ona ulufale se tasi le maota pe a le o se matai. A tomanatu i aso anamua i mea sa ou vaai au i ai o ou laitiiti se i tulou le Maota, a e alu e fai feau a lou tama matua, e te nofo i lalo ma le solo ma le apa fafano se i tulou e faatali sei uma ona taumafa. E uma na taumafa faapea, sole ia e manuia ia faamanuia le Atua ia te oe. E faapena le uiga e pei ona asa mai ai sui usufono mamalu o le Maota i le Paeaiga lenei. Sa ou taua le Maota lenei ina ua sufi le... e Namulauulu Lauaki se i tulou le Atua Fagalua ina ia au i le Malietoa i le taua, ua alu atu Malietoa ua vevele le vao o le malae, o le agaga o le tagata e sailimalo. I lou talitonuga, o le vevelelega malae a lena itu ma lenei itu a o loma le palota ua filifili mai ai tulatoa aemaise lauga o le Maota. Na filifili mai le tautua, na fili mai i le tagata e foliga faatauvaa ae i ai le meaalofoa a le Atua. O le tele o tagata e le iloa e le tagata sona taua ae ua na o le Atua na te silafia mea lilo. E pei foi

ona filifili o soo o Iesu, ia e tatou te le i faalogo lava na filifili i ni tagata maoae, e leai. Ae ou te faafetai i lenei vaitau lau Afioga i le Fofoga Fetalai e ese le manaia o sui mamalu o le Maota, e amata mai lava i lena itu i e na filifilia ma totoe mai i lenei vaitau. O sui sa filifili mai e ala i tautua a aiga, o nuu ma Ekalesia, lea lava ua faatuanuuina le taulaga mo Samoa i lenei vaitau. E faapena foi le Afioga i le Palemia ma lenei Itu, na filifili e le Atua o tatou tagata vaivai ma le faatauvaa e ave ma Taitai o Samoa i lenei vaitau.

Lau Afioga i le Fofoga Fetalai, e le toe alo se tala i se ata o se laau ma e le mafai foi ona faalafi le mea moni. Lau Afioga i le tele o le gugulu ai a le tatou atunuu e pei lava o le Matagaluega o le Soifua Maloloina o le Matagaluega e lafo i ai le faasea ma tulaga e pei ona i ai. Ae ou te faituaina ia mea o mea o tuualalo, o tuualalo aoga ua alaga mai ai le tele o sui usufono, aemaise le faamanatu mai ina ia mafai ona toe tepa i tulaga e pei ona i ai le tatou Matagaluega.

E muliai ou talanoa i le mea o lo o vevesi ai nei, a o lau tatalo i sui mamalu aua ne i i ai se isi e faalavelave pe tulai mai e faauilavea. Faatoa ou tali a i le tagata faauilavea pe a uma lau lauga. Ae tatalo atu ia faasao le taimi masalo ia le i ta le 5 ua tatau ona uma lau lauga, leaga e lavelave le Matagaluega ma e tatau ona manino ma malamalama. Ae ui i lea o le a taumafai atu i se faiga faigofie.

O lea ou le taea taitoatasi outou suafa, ae o le a ou talanoa i nauna lautele o loo maua e lea sui ma lea sui ma ou faavasegaina ina ia tuufaatasi ma faamalamalamaina tulaga e pei ona i ai. O le tulaga e pei ona i ai mataupu laga i mataupu pei ona taua ai faata pei ona tuuina atu i tua. E tele nisi o sui ua sai mai ma aumai le tala po o le a le mea ua ave ai tua. O le taimi lava na ou logo le tala sa feiloai ma le Pulega ma aumai le faamaninoga. O le agaga tonu o le mea lea ina ia tau faaitiitia le load o loo tauave e le Matagaluega i le taimi lenei.

E tasi pea le tatou teine o loo vaaia ia faata nei i le Matagaluega. Sa toalua a o lea ua faateleina le aoaoga a se tasi o tamaitai i Fiti ina ia toe foi mai ma auai i totonu o le Matagaluega i ana galuega fai. E le o se mea foi lea faapea ua... e tai pei o le case o le koviti ina ua tupu mai le koviti, sa fautuaina le Matagaluega ia mafai po o le a lava se private clinic e avanoa ia agai uma i ai tagata ina ia faafaigofie ona tauave faatasi lenei TP i tua ia latou e mafai ona fesoasoani nai lo o le taumafai e o atu uma i le falemai ma kiu ma laina ai ma faaputuputu ai ae tatau ona faafoia vave le faafitauli. O le faamatalaga la lea i le mea lena, o le isi mea ua matauina a o atu e i ai taimi e faatalitali ona ua i ai isi tagata ua uma ona fai atu latou appointments aemaise foi tulaga e pei ona i ai, ona faatali lea i nai itula. E fautuaina foi e nai fomai pe le mafai ona o atu i nisi private clinic e faataunuuina ai ia fuafuaaga. Ae afai lava e onosai ma e fiafia e tapuai ma onosai i ni nai taimi, ia e le teena e le falemai. E pei o le agaga tonu lea o le mafuaaga ina ia aua ne i faatali tagata, tiga na tumu ma le mafai e le falemai ona tauave ia tiute i le toatasi o le

tagata faigaluega po o le toalua ae o le a tumutumu ai a, a ua faafaigofie ona... O lau faamatalaga i lau Ofisa Sili o Pulega, o se tagata ese fautuaina. I taimi ia e le tele ni galuega e ave i tua i tatou general petitioner, ae sa tele le fesoasoani a lenei alo o le atunuu i le tatou koviti aemaise nisi o faamai sa tulai mai. I le taimi lenei o lo o i ai le ma pepa ma saunia lelei ina ia ave i le Kapeneta, ina ia uia ala o mea ia mafai ona tuu atu isi vaega o le galuega o mea e soosootauau ai ma le Matagaluega ina ia mafai ona faafoia le faafitauli o le le lava o fomai. Lau Afioga i le Fofoga Fetalai, e pei lava ona ou fai atu ou te le alo i se ata o le laau, o lo o faamatala manino mea o tulai mai i le vaitau lenei i totonu o le Matagaluega aemaise foi le tulaga e pei ona i ai le auaunaga.

O le aofaiga o fomai o lo o tauaveina galuega i totonu o le Matagaluega, i totonu o le Falemai i Motootua faatasi ma Salafai ma le tele o tatou Falemai i Nuu i tua, o le aofaiga e 89 ia fomai, 89 fomai, ua uma lava ona faatulaga i o latou faiva ma tiute aemaise foi le vaaiga o tatou falemai i tua aemaise foi totonu ma le auaunaga masani. O le aofaiga o tausisoifua e 709, 709 tausisoifua o lo o faasoasoa i le tele o tatou falemai i tua, o le service a le soifua maloloina aemaise foi totonu o Falemai i Motootua ma le tele o nisi galuega e pei ona i ai le latou auaunaga.

Lau Afioga i le Fofoga Fetalai, e tasi lea mataupu sa matua sa'i ai nisi o sui. A o le agaga o le Matagaluega ina ia faafaigofie ma tausoa le avega ina ia mafai ona faamama, aemaise foi tulaga e pei ona i ai. O le agaga e le faapea o ave i ai le... o lo o i ai fesaosoani masani e tuuina atu ae o lo o faia lava galuega masani ia ma run lava i a latou foi Private Business. A o le fautuaga i tagata a e susu mai o pisi pe tumu le Falemai, ia o lo o avanoa ia... o ituaiga fautuaga na lea e ave i ai. Ae tou silasila foi, e ese lou faafetai i le media e ese le manaia o latou lipoti, o isi taimi e sese o isi taimi e... Ae ou te faafetai, o lea lava e aveatu lau tala i le media ua ou faatagaina lau Matagaluega so o se isi e manaomia se faamatalaga aua ne i tuua, aua ne i tuua. A o le mea moni tasi lea mea ua faaseseina ai tagata o le ave o tala sese ma uiga sese o tatou faamatalaga. A o le mea moni lau Afioga i le Fofoga Fetalai o le agaga atoa lena e pei ona i ai se faatulagaga a le Pule Sili. Manatua foi le tatou Falemai faatoa fou nei le tatou CEO, ona suiga, o se tagata foi ou te le selu i ai, o se tagata atamai, e vave ona tilotilo i faafitauli, vave ona tau mai ia te au mea o lo o tupu ma mea e tatau ona fai i lo o le taatia lava o ni mea e tatau ona fai ae le faia. Ia lea pei ona taua foi, o le agasala le mea o le vaai i le mea e fai ae le faia, lea la e i ai nai suiga ia i tulaga e pei ona tau faamanino atu.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai, mo le fia faasaoina o le taimi o le Afioga i le Minisita.

**FOFOGA FETALAI:** Ia malie lau Afioga i le Minisita, se i...

**Afioga Hon VALASI LUAPITOFANUA TOOGAMAGA TAFITO SELESELE:** E i ai lau Tulafono lea na fofola atu lau Afioga, ou te le talia se faauilavea se i vagana ua uma lau folasaga e aafia uma ai a la mea ia. Malie maia lau Afioga i le Fofoga Fetalai.

**FOFOGA FETALAI:** Ia pei o le agaga lena o le Nofoa e lelei a le tuu se i maea lelei aua e maua a le avanoa e tuu atu.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai e i ai nai fesili ia ae ona o lea o le a mamao ese le Afioga i le Minisita. A o lea a ou te tulai atu i tatou Tulafono tumau.

**FOFOGA FETALAI:** Ia, Ioe

**Tofa Hon Lauofo Fonotoe Nuafesili Pierre Lauofo:** E lelei a le tatou sosolo pea i tatou Tulafono Tumau ae aua tatou te o i luga o Tulafono a le Afioga i le Minisita ona faigofie lea o le tatou galuega.

**FOFOGA FETALAI:** E moni a o tatou Tulafono Tumau ia ae fua foi i le e ana le mataupu.

**Afioga Hon VALASI LUAPITOFANUA TOOGAMAGA TAFITO SELESELE:** E manino Tulafono Tumau ae le avea le Tulafono Tumau e avea ai ma le le mafaufau. Ia ae ui i lea ia o le a ou talia.

**FOFOGA FETALAI:** E maua le avanoa.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai e leai se le mafaufau.

**FOFOGA FETALAI:** Ia o lea ua maua atu, ia se i tulai mai la le sui o Vaimauga Nu.1.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai o upu a le Atunuu a malie a se pese ia e manaia lava le saasaa. Ia ae matau foi i lenei itula o le aso, faafetai i le Afioga i le Minisita tasi lenei Minisita e faamanuiaiina tele lenei Itumalo. Ia ae pei e matau atu o le a se'e ese ma le faata, le tele o mea lea e i le finagalo o le Minisita.

O lea ua faalogologo manino ia le Atunuu pei o le agaga lena ta te faafetai ai lenei Minisita i mea o le faata lea sa lauga ai foi lenei itu. Ia ona o le popolega lea sa i ai lenei itumalo o le a toe faamatuu atu i tua i private faatasi ai ma le tau, ia pei o le popolega la lena o le tau. O lea foi ua e saunoa manino

pei o le faasilasilaga a ia sa tuuina atu e lau Matagaluega ma le Ofisa Sili i luga o TV, o le aso 1 o Iulai o le a le toe o i ai na o mai tigaina.

Ia pei o le agaga lena e manaia ia o le finagalo ia ae mafai foi ona e pei o le mea lea lena lea e gugulu ai le Atunuu, o le sese, e pei e foliga foi lea e ese le mea lea, e le o usitaia mai e CEO mea e manao iai le Afioga i le Minisita. O faasalalauga la e o na o mai tigaina, ae a e silasila lau Afioga i le Fofoga Fetalai, le Minisita aemaise o faata lea e faapitoa mo nai tina maitaga. Ia e o atu e faapena le agaga e augatata e o i private ona e leai se seleni, a o lea e tau mai e \$70. Ia ma le fesili foi sa tuuina atu e lenei Itumalo e fia ni private o i ai faaata nei? Le foi sa tuuina atu ma le tuualalo, maimau la pe ana o i tua private ae pay e le tatou Malo. Ae faamanuiaina a lenei Itumalo pe a e saunoa pei o le ala lena ua ou tulai atu ai ne i mamao tele i tua, tele mea na e te fia saunoa i ai ae galo ai faata ia leaga o lea e gugulu le Atunuu. O le aso 01, ae e faapena se lagona lau Afioga i le Fofoga Fetalai.

**FOFOGA FETALAI:** Mo le faasaoina a o le taimi o lau Afioga i le Minisita se i tuu atu i le Taitai o le Itu Agai.

**Tofa Hon Lauofo Fonotote Nuafesili Pierre Lauofo:** Ia, leai o le mataupu a lea sa ou tau tu atu ai foi ae leaga o lea pei sa le i maua se avanoa o le Sui. Ou te le iloa la o le mataupu lea, ia ae faafetai i lau Afioga i le sui o Vaimauga 1 e pei o le mataupu a lea na ou tau tu atu ai, pe vave maua la se fofoga ae pei e foliga mai o le fofoga o le sue mai o se tatou tagata foi lea e fesoasoani i si tagata e toatasi lea o lo o i ai.

**Afioga Hon VALASI LUAPITOFANUA TOOGAMAGA TAFITO SELESELE:** Malo faafetai.

**FOFOGA FETALAI:** Mo le faasaoina o le taimi o lau Afioga i Minisita, se i tulai mai le sui usufono mo Gagaifomauga Nu.1.

**Tofa Hon Faimalotoa Kika Stowers-Ah Kau:** Faafetai lau Afioga i le Fofoga Fetalai mo le avanoa o le sui usufono. Ia pei o ita foi lenei lea sa ou tulai atu i lata lauga i Aso Gafua ae... E pei foi lea ua oo mai le lagona ia te au pei a tau ova ma le ofo. E ese le manaia o le sausaunoa mai a le Minisita lea ua aumai ai. A o lea sa ta tuualalo atu o mea ua salalau, ua ova i le tolu vaiaso, fa vaiaso. A o lea ua saunoa mai le Minisita, ia a o i ai i Atunuu i fafo sa ou faalogo mai, ia a o lea sa saunoa mai ai le Minisita ia ta ita, ou te le i faalogo a e i ai se mea. Lea na tuuina ai foi ta ita, pei foi lea e taetae lapisi, faaoloataua lau lauga e faasese ai tagata. Ae pau a lea o le mea sa ta tu atu ai, e iai la mea ia o faata, o totogi o taimi ma alauni sa ou tago taofai ia aua nei tupu, aua nei tupu. E pau a le lagona tatou tilotilo e ave le faamuamua i tagata ae aua le ave le faamuamua i tupe. O tupe e maua ae o

le ola o le tagata e le faatauina i se faleoloa, lea o le a pasi le tatou paketi, maua tupe fai le fuafuaga fetuunai aumai ni tagata e faia mea ia. O fea le mea a o i ai matou i tua ma Savaii e aumai ai le tai \$70 tai \$80 e vaai ai le private? E pei o se tulaga lea e avatu ai ona o lea na tuuaia taita a o lea la toa admit mai le saunoaga a le Minisita o lea ua leva ona faalogologo mai fafo a o lea na fai mai na te le i iloa se mea e tasi. Ma le agaga faaaloalo.

**FOFOGA FETALAI:** Ia lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** E ese le faalogo ese le talanoa i le Matagaluega. Sa ou fai atu se i ou talanoa i le Matagaluega. Ae ese a le faalogo ese le talanoa ia aumai mea moni. O lea la ua ou talanoa atu i tulaga e pei ona i ai. E le o se faamatalaga na ave ua outsource i tua. Silasila la le Maota, o le tatou atunuu e le tumau le talitonuga i se mea e tasi e te fiu e taumafai e talitonu i se mea e tasi e le mafai. E ese lou talitonuga ese foi le talitonuga o le isi tagata.

O le mea lea e tulai mai e le o faamuta e le Matagaluega e sa ona alu atu se isi i le Matagaluega, o faafofoga mai. O lo o tatala lava e le Matagaluega avanoa ae pei ona ou avatu o lo o fuafua i tulaga e pei ona i ai le load o lo o tauave. O le taua o le mea lea na aumai e le Taitai o le Itu Agai, o lea foi ua i ai le fuafuaga o le a saili mai se tagata faapitoa e fesoasoani. O lea foi ua faataga mai e le PSC Specialist o lo o fia maua ina ia mafai ona aumai. O lo o i ai foi le taimi ou te talanoa atu ai i tulaga o taimi faapitoa o fomai faapitoa e auina mai pei ona faataoto le \$3 miliona e faapitoa i ma'i e mafai ona taoto iinei ia faaitiitia ai le avega e ave i fafo o tatou gasegase. O lea la e taaatia e i ai se taimi ou oo atu iai mo le faamalamalamaga ae faafetai o lea ua aumai foi le fautuaga. Ia o le agaga lena lau Afioga i le Taitai o le Itu Agai ua faataoto lava fuafuaga ina ia mafai. Ua leva ona i ai le talosaga aemaise foi o lea ua talia e le PSC nisi Specialists se 6 mo le Matagaluega ina ia mafai ona taoto fatu iinei. A ua leva ona tauave mai e lena Faigamalo tulaga faapena aemaise foi... Ae se i silasila o lenei na o le lua tausaga ma nai masina a o lea ua faataoto a fuafuaga ina ia mafai ona fuafua lelei tulaga e pei ona i ai. Ae onosai mai o lea lava e faasolo atu le tulaga o le faamalamalamaga e pei ona i ai.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai ou te tulai atu o se mea e fia faasao.

**FOFOGA FETALAI:** Malie lau Afioga i le Minisita.

**Tofa Hon Lauofo Fonotoe Nuafesili Pierre Lauofo:** O lo o i ai polokalame ma ua i ai polokalame o lo o faagasolo pea mo fomai faapitoa mai fafo. Lea foi la sa i ai le polokalame na amata i le 2018 mo mea o

Specialist mai le Malo o Saina ia lea lava o lo o faaauau. E iai foi la ma isi foi ituaiga gasegase o lo o faaauau pea. Ae ou te masalo leaga o lea e tau puepue atu i lau faalogo masalo ai po o ni specialist foi lea e omai e galulue tumau iinei lea e saunoa ai le Afioga i le... o se faiga lelei tele la lena faiga aua o lea o le a maua i taimi uma ae le faapea o le a faatali vaitaimi. Po o le sao lea lau Afioga?

**FOFOGA FETALAI:** Ia lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai. Lena tonu a lau Afioga i le Taitai o le Itu Agai, leaga ou te musu ou te talanoa atu foi lele i tulaga nei meaane ua faapea, ia o lea sa saunoa. A o le agaga lena o ni tatou Specialist tumau ina ia mafai, aua e tele a isi area po o isi vaega e le o mafai ona meet e tatou Fomai. O le ala foi lea o le tou silasila i le alu o le mai i fafo e le o faaitiitia, e faateleina ai le tupe a le Atunuu ina ia taumafai... O lea foi e inei le team a Saina ua uma foi ona ou sainia le MOU ma Saina i le tulaga o le team pe 10 ea fomai lea e i ai. Ia ae o lo o moomia lava nisi Fomai. O Initia o lo o i ai foi le fesootaiga faapena ina ia mafai ona oo mai ia ma faafaigofie ai le tatou... I le matau i lenei vaitau lau Afioga i le Fofoga Fetalai o le gasegase ia o tagata o le tatou Atunuu, tele le mai. Ma ou te talitonu foi ia e le mafai, le mafai ona tatou nofonono ai, e tatau lava ona i ai ni tatou Fomai. A silasila la i isi vaega pei ona taua foi le Fomai mata se i tulou, avea lenei taimi ou te faafetai faapitoa ai i le Tamaitai o Lusila Ah Ching. E ma te omai le fonolea mai Tutuila a le Atoa Samoa na maua mai ma le CEO i Tutuila le faamatalaga a Tutuila a le Falemai sa matou feiloai ma le soifua maloloina. Ua uma ona saini Lusila o le a alu i Tutuila, sau loa i le taimi muamua ou fai atu i lau CEO lea e faafofoga mai, feau le Fomai e sau tatou talanoa. Ia e le natia ma o le mitamitaga lena sa galue i ai i le Tamaitai Fomai, ia toe mafaufau, toe fetuunai le tofa aua ne i faasili le tupe ae ia faasili le alofa ia Samoa. Ia ae te i ua ou maua le tala ua ota fiafia ai ua toe feliiu ai le tofa a le Tamaitai Fomai aua e pau a lena o le Fomai Specialist a tatou o mea tau fofoga. Ia lea foi la ua i ai le fuafuaga ia sau se isi tagata faapitoa ina ia mafai ona galue faatasi ma train ai nisi tagata i tulaga e pei ona i ai lea foi vaega. Aua e le na ma le laina o le tele ia o tagata e gasegase fofoga. O le tele o nisi tatou tagata ia e agai i Niu Sila. O nisi foi faiga a Niu Sila na omai le team talu ai nei a isi Specialist o mata na ona omai e asiasi, e vaai. Ia na i ai appointments i uta a o tua o na mea fai mai, e le mafai ona latou taotoa ni mai. A o mea a tama ia i lau vaai faa... e manao ia avatu mai i Niu Sila e taoto ai, ia e tai \$10,000.00 Niu Sila le tau pe sili atu. O le agaga la e sili ai le aumai o le Specialist taugofie e sau e galue faatasi ma tatou alo ma fanau, ia ona faigofie lea o nisi a tatou fuafuaga mo le lumanai.

Ona ou oo mai lea i le tulaga o le tuualalo a si ou uso mai Salafai i nofoa faataavalevale, ia lea ua. manino mai...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai ona o lea ua se'e ese le Afioga i le Minisita.

**FOFOGA FETALAI:** Ia malie lau Afioga i le Minisita.

**Tofa Hon Lauofo Fonotoe Nuafesili Pierre Lauofo:** Ia ona o lea ua matau atu o le a see ese ma le mataupu tonu lea o tatou Specialist ona o lea sa ou taua, e manaia tele le faamoemoe lea o le falemai fou e \$3 miliona le tatou Specialist lea sa ou taua lau afioga, ae o le a se fuafuaga i le anofale i le tulaga o equipment's o mea foi ia e faaoga, aua a omai foi fofoma e tatau foi ona iai mea ia o masini ma mea e faatino ai latou galuega e pei o le vaega lea sa ou toe tulai atu ai.

**FOFOGA FETALAI:** Ia lau Afioga i le Minisita

**Afioga Hon VALASI LUAPITOFANUA TOOGAMAGA TAFITO SELESELE:** E le mafai ona faia se mea e omai fofoma tūtū ai e leai ni mea e faigaluega ai e leai, o lo o i ai fuafuaga o lo o i ai polokalame e tatau ona omai ae ua i ai. Ua i ai foi nisi ua ofo mai e mafai ona latou faatotogaina ia mea e le faapea la e faamalie atu i le Taitai o le Itu Agai e leai e omai lava tatou Specialist ua iai mea e tua iai ma o isi tagata e ofo mai lava latou e tapena mai latou meafaigaluega, tasi lena mea taua ua uma ona fesootai aemaise foi o lo o taoto fuafuaga faapena ina ia mafai ona manuia ai le tatou atunuu. Ae faafetai i le Taitai o le Itu Agai le faamanatu mai.

Ona ou talanoa lea i nofoa faataavalevale po o wheelchairs o lea ua faamaonia mai e Salafai aemaise foi o tulaga o le i ai o tatou wheelchairs ia o loo lava tatou wheelchairs i Tuasivi, lau afioga i le sui mamalu faafetai mo le laga. Ae masalo po o le lua talanoaga lea ma le tamaitai i luga o le telefoni ou te le iloa po o se talanoaga faaleuo po o se talanoaga asiasi aua o na mea o tala i luga o le telefoni, a o lea ua e faafofoga mai ua faamalieina o lo o talatala mai e Tuasivi o lo o lava ma totoe. E na o le lua lea na e silasila i ai o lo o faapea mai le teine o lea e faaoga ona o le faaoga ma le tatau aua e faapena le auai mai o le lua lea ia ma avatu iai le fesoasoani i nai gasegase, ae o lo o lava nai nofoa i Tuasivi. O lea e faamalie atu ai i le sui o lea ua faamalieina lea vaega. Ia a o lea ua ou vaai atu o lea ua toe tulai mai le tamaloa.

**FOFOGA FETALAI:** Ia malie lau afioga i le Minisita se i tuu atu i le sui usufono mamalu na laga ia nofoa faataavalevale.

**Tofa Seuamuli Fasi Toma (Gagaemauga 2):** E le mafai ona ou faaleoina le upu foi lea e leai se agaga e faalavelave i le saunoaga a le sui usufono mamalu, aua e ala ona tulai e tulai o le faalavelave o le mea e fia faamalamalama.

Faafetai i lau afioga Minisita ua matua maua lelei lava, e moni lava oe i nofoa faataavalevale. O le telefoni ia o le telefoni sao a ia pe i ai ni mea e manaomia e faaleo aua le tatou motu i Savaii ae o la e ola si ou toalua vaeatu le paia o le Maota ma lau afioga i le Fofoga Fetalai ma le paia o le Palemene.

Ia ae o tulaga i nofoa faataavalevale ia faafetai tele lava ua faamalieina foi le sui usufono aua foi le tatou motu. Ma le faaaloalo faafetai.

**FOFOGA FETALAI:** Malo faafetai, ia lau afioga i le Minisita.

**Afioga Hon VALASI LUAPITOFANUA TOOMAGA TAFITO SELESELE:** Faafetai il au Afioga. E faamalie atu i le sui usufono e le o se agaga e faalavelave, a o la e faaalavelave. Ae ui i lea faafetai. O le faafouina o falemai. E tele tala sa ave i tatou falemai ua le lelei ona vaai, ua tutulu ua a. O le tali manino e le 'alo i se ata o se lauu. Afai o falemai nei na fausia i le taimi o le HRPP sa tataua ona vaai lelei i le faiga pe faigofie ona maintain. Ia, o le mea ua tupu o le mea lea e ala ai ona tafe mai le vai i luga aua o Konekarate a Saina na latou faia, sa fau lava e aunoa ma se vaai lelei o tatou inisinia, e alu paipa i luga. O le mea ua tupu ua mama mai paipa foi ia i luga o ea malulu. Lea la ua galulue le Matagaluega ua fai le faiga ina ia fai ese lava ea malulu e ese mai le system lea na fai e latou, ia a o lea ua galulue le Matagaluega. Sa faamuamua le tatou Outpatient a o lea ua faasolo lava i le tulaga e pei ona i ai. Sa taumafai ia maea lelei galuega a le tatou Outpatient lea ua toe faafou ia mafai ona lea ona toe... a o le tele a o mea ua faafetai e lua Kamupani o lo o latou tauaveina le faaleleia aemaise foi o le teuteuina afai foi o le a se matau, ia e pei lava ona ou fai atu sa ou sau i le taimi lea faatoa ou alu atu i asiasiga muamua aemaise foi sa ma mafuta ai ma se isi o CEO o le faafitauli a lea e tasi, faaletonu le vai lea e sau i le ea, tafe mai lalo ma susu ai le floor. Ia ona aveane lea o paelo foi ia ua faatali ai. I lou la talitonuga ou te le tuuaia la, ae o le agaga taua o lea tatou te taumafai se auala ina ia mafai ona faafoia fausaga ia a Saina ma e manatua foi ia faletetele faapenei e 10 loa tausaga e tataua ona toe tuu i lalo ae toe fai se fale fou. Ia o mea na e tupu i mea o atunuu tetele e lelei le tamaoaiga a o tatou e taumafai a e lipea se mea o faaletonu lea la o lo o galulue a le Matagaluega i se tulaga e mafai ai ona faafoia ia faafitauli ae le mafai ona ou fai atu e sese le mau lea e aumai ou te faafetai ma viia i latou sa taumafai e aumai faamatalaga aemaise foi tulaga e tataua ona vaavaai i ai.

O le tatou falemai i tua, o le agaga foi lea sa aumai e nisi o tatou. O le mea o lo o tupu nei i tatou falemai o le fale o fomai, o le tele o falemai, e le' o lelei le latou eleele. O le uiga o lau tala o lo o i ai aiga o lo o finau ai ia nisi

foi o falemai e fougou atu ae aumai taofiga a aiga. Ou te le taua ia maota gasegase ia aemaise foi o lea lava sa lauga mai ai nisi o sui ma tautino mai o lo o taumafai e soalaupule eleele. E lua a falemai ia ua mautinoa lea ua matuai seki lisi ua uma lelei ona fai lelei faatulafono e na o Sataua i le mea lea ou te sau ai ma Satupaitea. O Safotu foi e lua aiga na e feteenai ai. O le ala lea, ne i te i ua faapea aemaise foi Lalomanu e toafa aiga sa i ai aiga na omai i le Ofisa lau afioga ae ou te le taua atua suafa, ae ua aumai latou tusi ina ia i le tulaga a lea e faapea e le i toe faafouina latou lisi o lo o finau i le lisi ma totogi e omai foi e eseese tupe o la e totogi i ai. E pei la o le tiute lena o lau afioga i le sui usufono, ia se i e silasila lelei ane i ai, a e fia maua suafa o aiga ia, na e susu atu lea e ta talanoa ao loo faagasolo ia tulaga. O lona uiga a faamuamua le falemai i Sataua ua outou faapea sole, o la ua faamuamua le falemai o le Minisita. Ae afai e faamuamua o la e lelei le faiga o lisi i tulaga e pei ona i ai aemaise Satupaitea. Ia Lautafi o lena ua fai atu e le'o se tala e avane ai ae malo o lena sa tapena lelei lisi ma aumai i totonu o le tatou Matagaluega aemaise foi tulaga e pei ona i ai. Ae afai la o i ai ni faalavelave e tai pei foi o le falemai i Foailalo, uma le faamasinoga o la e feteenai ai aiga. O lea foi sa ou talanoa i le Minisita o Tupe e tataua ona omai aiga na pe fai se maliega ina ia faaauau pea le atinae a ia fai se laua faiga ina ia fofu ai, aua e oo mai le taimi lenei e le i release ina ni tupe o lisi nei talu ai o le femisaaiga i aiga e ona fanua. O le ala lea, se i faamanino atu lava vala lea, ne i faapea o le taumafai ina ia nisi tulaga o le agaga lena. O le tulaga lava ia e alu le tapenaga o le fale o le fomai ia ma toe faafou ai nisi o falemai. E i ai isi falemai i fausaga ia o le taimi lea, masalo o le taimi tonu a lea o Leota Laki lea e saofai atu sa CEO ai e pei e tasi le potu ae tuu i ai tam, a o tina o tamaiti, ae lea o le a taumafai ina ia faeseese. Ou te le'o taua le Suafa o Leota ae ou te iloa ou te matau i le taimi lea o le taimi lea, e i ai falemai toetiti lava tutusa, ia o lona uiga tasi lena mea o lea lava e galulue ma ua amata ona faagasolo galuega i lisi ia ua mautinoa ma fanua ia ua mautinoa, ae faaauau ae o lo o i ai lava seleni o lo o tauave ai ia poloketi, leaga ua leva na faataoto mai i lena itu ae e tataua a ona faatino. Ae o le mea manino ua leva ona fai isi falemai ae le o i ai ni lisi e le o manino ma le isi mea o le tulaga e femisaa ai nisi o aiga.

O lea foi sa lauga mai le sui usufono o Samatau ma Falelatai e faafetai i le sui usufono i le mataala foi le afioga i le sui usufono o lea sa ma talanoa o lo o i ai foi feteenaiga ia ua omai foi nisi aiga ua aumai tusi ia o lo o taofia le mea sa... ia lea ua talanoa mai le sui usufono o lo o i ai ni tuutuuga faapena. O nisi o falemai o lo o saofai mai le sui o Lufilufi po o Aana Anoamaa, a o lo o i ai foi le fuafuaga e sii le falemai lea ona e le toe i ai sesi atinae e faia i le falemai lea, ua uma ona talanoa ma le faipule, lea foi ua saunoa mai le faipule o le a omai le itumalo ia ma talanoa, ua latou maua se fanua e sii i ai Lufilufi. A outou silasila ia Lufilufi ia ua tu i i le falemai ae

vanu atoa le mea e pei ona i ai, e fai si pumoomoo o le mea o lo o i ai le falemai, ua uma foi ona logologo i ai tulaga uma. O le auaunaga...

**Afioga Hon Lautafi Fio Selafi Purcell:** Lau Afioga le Fofoga Fetalai...

**FOFOGA FETALAI:** Malie lau afioga i le Minisita se i tuu atu le avanoa i le sui usufono mo Saupaitea.

**Afioga Hon Lautafi Fio Selafi Purcell:** E leai lava sou manatu ou te faalavelave i le lauga matagofie a si ou uso, ia leaga o lea la a ou faalavelave pea i ai leaga le mea lea sa ou lauga ai. Ae faafetai tele i le lauga faamalamalama a le Afioga le Minisita, o le mea ou te fiafia ai, lea ua tau lelei mai lava e le Minisita na o lana falema'i i Sataua ma le falemai i Satupaitea e leai ma ni mea e taofia ai le faagaoioi loa o isi atinae, e pei la o le mea sa ou talanoa ai i le Afioga i le Minisita i fale o fomai, lea ua saunoa mai le Minista e leai a se mea e faalavelave i lo'u falemai ma lona falemai. Ae ou te au i le manatu o le Minisita, aua le faamuamua lou falemai, e upuia ai oe e tagata, Ia faamuamua le falemai o Satupaitea, ona agai ai lea i luma ua leva na ou vinavina i lau Afioga i le mataupu a lenei ae o lea la ua ou faalogo atu. Faafetai lau afioga o lea o le a faamuamua taua.

**Tofa Hon Lauofo Fonotoe Nuafesili Pierre Lauofo:** Lau Afioga le Fofoga Fetalai mo le faasaoina...

**FOFOGA FETALAI:** Ia mo le faasaoina lau Afioga i le Minisita, lau afioga le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Leai e puupuu a le fesili, po o le fuafuaga foi lea sa i ai mo le siitia o le falemai lea mai o i Salelologa, po o ua faaauau lena faamoemoe po o ua leai. E pei o le fesili atu lea i lau Afioga Asiata aua o lea o le a faifaatasi le lua falemai ma le Afioga ia Lautafi ae tuu o i Sataua.

**Afioga Hon VALASI LUAPITOFANUA TOOGAMAGA TAFITO SELESELE:** O le mea lea sa ou popole ai...

**FOFOGA FETALAI:** Ia lau afioga i le Minisita.

**Afioga Fuaava Suluimalo Amataga:** Lau Afioga i le Minisita. Oi le Fofoga Fetalai faamolemole manu o maua le avanoa.

**FOFOGA FETALAI:** Mo le faasaoina se i tulai mai le sui usufono mo Aleipata Itupa i Luga.

**Afioga Fuaava Suluimalo Amataga:** Faafetai lava i lau Afioga i le Minisita ua taua le tulaga lea i le falemai i Lalomanu. E pei foi ona i ai le fuafuaga i le maota mo le fomai aemaise foi le extension lea e fuafua i ai tatou faamamatoto lea e le i mautu lava le tulaga lea, ae na o si faafesili atonu o lea ua faafofoga mai le matou itumalo, pe ua ponatia ai le atinae lea ua fuafua atu ona o vaega ia o le lisi ae se i fai se galuega, ona ou te le i maua la le tulaga lea o lo o i ai faafitauli faapea. Ia mo le faafofogaaga a le tatou Maota ma le agaga faafetai.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai.

**FOFOGA FETALAI:** Se i tulai mai lau Afioga le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Lau Afioga, faafetai i le Afioga le Taitai o le Itu Agai, o le agaga tonu lau Afioga e ala lea, pe o au o le Sataua po o le matai o Satupaitea, e le tuia ai atinae e tatau ona fai le faamuamua pe afai ua fuli mea uma. E pei ona ou talanoa atu, ia e fai foi e fai i lou taimi le matou falemai, ua fetai, aua ua leva na i o le alii la o Lautafi ia ma Faimalo ae tatau na fai. Ae ui i lea, e leai, e le o taofia ai polokalame lau Afioga i le sui usufono mamalu mai Aleipata Itupa i Luga. Pau a le mea o le manao, leaga e le fetai foi lea ona e tele galuega a le matou Matagaluega.

**FOFOGA FETALAI:** Ia malie lau Afioga le Minisita leaga o lea ua e taua le suafa o le sui usufono mo Gagaifomauga 1. Saunoa le sui usufono mamalu.

**Tofa Hon Faimalotoa Kika Stowers-Ah Kau:** Faafetai lava i lau Afioga. Ia e pei foi lava ona saunoa mai i le taimi o ou i ai i totonu i o, e le i tele se taimi na ou i ai i uta. Ae sa ou vaaimamao. E pei lava ona ou fai atu i le vaiaso ua tea nei, lufilufilimalelei. Lena la ua e sau tonu ai lava nei, ne i te i ua faapea ma isi itumalo ua ave le faa... ae o le tulaga lena. Ae ua leva ona ou fiat ago e fai le falemai le la, leaga ua 10 tausaga talu ai na toe fai ai lava e le matou itumalo le falemai ae leai se tupe a le Malo na alu ai. Ma lou agaga faaaloalo.

**FOFOGA FETALAI:** Malo. Tulai mai lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai. E ese le taua. Lau Afioga i le Taitai o le Itu Agai ua uma ona tuu mai eleele e 20 eka mo le faamoemoe lea, o lo o ua i ai foi tagata sa talatalanoa i nai donors mai fafo, o lea e faatalanoa mo se seleni,

aua o le falemai lea i Salelologa, e le o se tamai falemai, e tataua ona fai lelei e center i ai Salafai. A o lo o ua i ai fuafuaga ma gaoioiga i tulaga e pei ona ona i ai ina ia mafai ona faataunuaina, ae moni lava lau Afioga, o lo o tumau pea le agaga sa faataoto mai foi faamoemoega i lena itu, ia o lea lava e tauave. O le agaga foi na tulai mai ai Satupaitea, ia tasi ae foi atu Lautafi lau Afioga i le sui usufono, aua e te popole. A lelei lau amio, ia e vave lava ona fai nai mea na o le tatou nuu foi i Satupaitea. Ae aua e te avea le ta va faa-Satupaitea e te solifono ai i isi taimi ma tau mai manaoga. A i ai se mea ia musumusu ane i tua.

Lau Afioga i le Fofoga Fetalai ona ou see mai lea i tulaga e pei ona i ai faleletaua, e tele ina lauga ai nisi o sui usufono o le tatou Maota, tasi lea mea e ese le taua, o le tele o tatou faleletaua o lo o i totonu. Ou te iloa foi e le na o le falemai tulaga o lo o i ai mea faapenei, ae moni a au o lo o i ai nai... ia ua uma foi ona taumafai i ai le Matagaluega ina ia faaleleia nai mea o lo o... ia le ituaiga mea foi lele e alu atu i le isi taimi ua leai se ki ua malepe. Ou te le iloa i le tagata e alu atu e faaoga le toilet, se i tulou, ae soona fai ai fua au o mea o... e faapena uiga o tagata. E le mafai ona tatou faatonua le tagata foi lele e le masani. O nisi tagata pei e le masani i le faaogaina o ia mea ae ua taumafai lava e faaleaga tulaga, ae aua le popole o lea ua oo i ai le silasila ma ua taumafai le Matagaluega ina ia vave faaleleia ia tulaga uma.

Ia, e pei ona ou fai atu e oo i nisi sa laga le faamamatoto po o le NKF, ia, e pei ona faapea mai se tasi o sui usufono, o le fale faamamatoto i Salafai, e susue atu le faitotoa a o la e faatali mai pe tilotilo atu i le falemaluu. Ia aua ne i galo i le sui usufono sa laga, o le iuga lena o le tagata faamamatoto, o le vaai pea i le falemaluu. Aua foi e le faatagaina, ma o lea e fautuaina, tatou aloese ma na mea o le faamama o le toto, aua ne i taumafai e faamama le toto. Afai ua faamama, o le iuga lena... O le ala foi lena na fai ai e tagata Salafai le mea lea po o le Matagaluega, ia silasila sao lava le tagata faamamatoto i le taunuuga o faamoemoega.

Ae ui i lea, taoto mai o lea ua uma ona fai le fale faamamatoto manaia i inei i Upolu, o le isi lena sitepu o le a taumafai e asiasi atu le faaleleiga i Salafai, ina ia mafai ona foia faafitauli o atugalua ai le sui usufono e pei ona i ai le tatou falemai faamamatoto i Salafai.

O le tulaga... ona me'i mai lea i auaunaga faapitoa nei pei o lea tuutiitia ai lea o le soifua maloloina ina ia tuutiitia gasegase e auina atu i fafo faatatau la i le \$3 miliona lea ua ou toe taua, e faatatau lava ina ia aumai tatou specialists, tagata faapitoa nei ina ia mafai ona faafoia nisi o faafitauli ua tele ai a tatou gasegase e tuuina atu i fafo.

So o se mea lava i gasegase nei, ua masani lava i le faagasologa, e le tau faamatalaina. Afai lava e taliaina e le vaega a foma'i o lo o latou vaaiia le tatou vaega lea e aveina tagata i fafo mo ma'i, ona avatu lea o le pepa ia te au, ona saina lea ma ave i le Kapeneta e faatatau mo le ioeina ina ia mafai ona... ae avatu foi i le Kapeneta e toe iloilo lava. E vaai lelei lava i le tulaga

pei on ai ai. Ae aua ne i galo, e i ai taimi foi lele e te fiu e tali nai aiga e tutulu lava i luga i le ofisa ma taumafai... aua o tatou a faamalamalama atu ua cancer, e taumafai lava pe mafai, e mafai lava ona ave e latou aiga, a o se faiga faafaigofie. E tiga foi ona ave i ai le faamamafa a fomai ma faamalamalama, ia o le uiga lava lea o tatou e taumafai lava ina ia, ia ona ave lea i fafo e le umi ae maliu mai. Ae tatau foi ona talia e tatou tagata faafitauli ia ina ia mafai ona silasila totoa i ai ma ia faamamaina tulaga e pei ona i ai a latou foi tupe maua, ia po o tupe alu i tulaga e pei ona i ai ia...

Ia ona ou me'i mai lea i le mataupu o lea e luga lalo ia tulaga o alauni, o ovataimi o le aufaigaluega, e pei ona taua e le sui usufono mo Aleipata Itupa i Lalo, aemaise foi o le tele o nisi sui usufono sa latou laga ma fesiligia tulaga e pei ona i ai.

Mo le silafia e le mamalu o le Maota, ua faagasolo nei fuafuaga ma ua amata ona faamaea sailiiliga a le PSC, ua leva ona latou iloilo ina nei faiga. Aua o le agaga sili ona taua ia te au, sa amatamea mai lava lene itu i le tau faatulagaina, a o le i tuufaatasia le Matagalauaga o le Soifua Maloloina ma Auaunaga a le Soifua Maloloina e pei ona fai i le taimi nei, sa faaaogaina le Tulafono o Leipa, o le Labour and Employment Relations Act i le 2016 e limataitaiina ai galuega faatino a le auaunaga o le Soifua Maloloina po o le NHS. Ma sa faaaogaina le taiala o le faatinoga o galuega a le auaunaga o le soifua maloloina, le National Health Service Working Conditions e totogi ai ovataimi o le aufaigaluega. I lene taimi, e leai se tapulaa o itula e ova ai le tagata faigaluega, po o le aufaigaluega. Ma o le totogi o ovataimi a le aufaigaluega, sa fua lava i le maualuga o le totogi o le fomai, tausisoifua, po o tomai lagolago o le soifua maloloina. E ala ona ou faamaninoa mea ia, ina ia malamalama le Maota i le mea sa afua mai ai le tulaga o lo o vavao ai tulaga pei ona i ai. E oo foi i le aufaigaluega faakonekarate po o i latou ua sili atu ma le \$70,000 lo latou totogi masani i le tausaga, e agavaa uma i le ovataimi. A oo i le taimi e totogi ai ovataimi a le aufaigaluega, ua oo lava le maualuga o le ovataimi e totogi atu i le tagata faigaluega, ofisa po o le junior foi e toatasi i le \$10,000 i le lua vaiaso. Afai o le ovataimi lea mo le tausaga atoa, o lona uiga, e tulai mai i le \$260,000 faaopoopo lea i ai ma le totogi o le avanoa faigaluega o lo o faigaluega ai. Faataitaiga, o le fomai faatoa faauu e \$40,000. Mo se faataitaiga, o lona uiga e uma ane le tausaga ua \$300,000 le tupe e totogi ai lene fomai junior.

A vaai faalemafaufau i ai, ua matua le talafeagai lava, ua sili atu ma le totogi o Le Ao o le Malo, o le Palemia, o le Kapeneta. A o le fesili; o fetai taimi o talosaga mai ai le aufaigaluega e totogi ovataimi ma faitioga a le mamalu o le atunuu? E fiu e faatali, e leai se fomai. E fanau ane lava le tina, se i tulou, e le i vaai e se fomai, aemaise le tele o gasegase e tuuina atu i fafo. O lea foi e i ai faamaumauga a le Matagalauaga, e i ai le tausaga faaletupe na le mafai ai ona maua totogi o le aufaigaluega i le auaunaga a le soifua maloloina on aua leai se tupe, ua uma i le totogiina o ovataimi ma faaoga

faasoloatoa ai ma tupe sa faaagaaga mo totogi masani a le aufaigaluega. Atonu o se tasi lea mafuaaga na mafua ai ona toe tuufaatasi le Auaunaga o le Soifua Maloloina ma le Matagaluega o le Soifua Maloloina. I le aso 1 o Fepuari i le 2019 i le faigamalo talu ai na amata faamamaluina ai le tuufaatasiga o vaega nei e lua o le Soifua Maloloina, sa tatau i lea taimi ona aloaia ai le faaleaogaina o le faaaogaina o le NHS Working Conditions mo le totogiina o faamanuiaga a le aufaigaluega galulue ai, ona ua faaleaogaina le Tulafono o le Auaunaga o le Soifua Maloloina i le 2014, ae teuteu le Tulafono o le Matagaluega a le Soifua Maloloina i le 2006 i le 2019 e atagia ai matafaioi faaletulafono sa i lalo o auaunaga o le soifua maloloina NHS. Peitai ane, o le mea ua tupu, ua tuufaatasi le aufaigaluega ae eseese taiala o faamanuiaga sa totogi ai alauni ma ovataimi.

O le aufaigaluega sa galulue i le auaunaga a le Soifua Maloloina, sa faaaogaina lava le taiala o faamanuiaga o galuega o auaunaga a le soifua maloloina NHS Working Conditions seia oo mai lava i le taimi lenei. A o le aufaigaluega sa galulue i lalo o le Matagaluega o le Soifua Maloloina, sa faaaogaina le taiala o faamanuiaga o galuega a le Komisi e Pulea Galuega a le Malo. O lea la ua tulai mai Komisi fou e Pulea Galuega a le Malo ma toe tau faatulaga vaega nei i le tulaga e tatau ona amiotonu ona faatinoina ai galuega ma faamanuiaga a le Matagaluega o le Soifua Maloloina. O le Matagaluega o le Soifua Maloloina, o lea ua i lalo o le Komisi o Pulea o Galuega a le Malo. O lona uiga o faamanuiaga e agavaa i ai ma le faatinoga o a latou matafaioi ia mulimulitai i Tulafono ma Taiala a le Komisi e Pulea Galuega a le Malo. Ma i lalo o taiala o faamanuiaga o galuega faale-Malo, PSC Working Conditions, e na o le aufaigaluega tumau permanent staff, e agavaa i ovataimi, a o le aufaigaluega konekarate, e le agavaa i se ovataimi. A o faamanuiaga i faaiuga o konekarate alauni, o i tonu lava lea e afua ai ona tapisa o le aufaigaluega na masani ona totogi alauni ma ovataimi i lalo o le auaunaga a le Soifua Maloloina i le taimi nei. Ona o lea, o le a amata faamamaluina se tasi o taiala e taialaina ai le faatinoga o auaunaga ma le totogiina atu o alauni ma ovataimi a le aufaigaluega. Ou te faafetaia le Komisi o Tagata Faigaluega. A outou silasila ma faafofoga e pei ona ou talanoa atu, e eseese taiala na faafoe ai totogi o le Matagaluega. O i lalo o le NHS sa ese foi sa pule lava latou i ovataimi. O lea foi e ia te au le pepa faamaonia mai i le PSC, i tulaga o le tupe na faaalu mo ovataimi i lea tausaga ma lea tausaga. E foliga mai, e matua maoae, e faitau \$15 miliona ia tulaga e pei ona i ai ia eseese. E oo i le \$16 miliona i le tulaga e pei ona i ai le faatulagaga, ona o le eseese o taiala.

O le ala lea lau afioga i le Fofoga Fetalai, o lo o tapisa le malamalama le toatele o tagata, ae o le mea na faataoto lava, e tatau ona tuu faatasi, ua uma foi ona i ai le FK a le Kapeneta sa i ai i ia vaiata, ina ia merge loa, faataunuu. Aepeitai e le i taunuu, mafua i se a? Sa i ai tulaga e pei e taufaafefe mai le... o lou tagata o le Minisita o le Soifua Maloloina, ae le mafai ona ou alo

i le mea e tatau ona fai... Na amata mai lava sa tatau ona tuufaatasi, ua leva... ae o lea foi e manino le tulafono...

**FOFOGA FETALAI:** Ia e faamalulu atu i lau afioga i le Minisita se i tulai mai le sui usufono mo Faasaleleaga 5, sa e lauga i mea ia?

**Afioga Peseta Vaifou Tevagaena:** E masalo ona e le i usufono le afioga le Minisita, ae sa ou faatalosagaina ai le Minisita o Tupe, i le tulaga tonu lava lea ua saunoa ai lau afioga i le Minisita. O lea sa ou vaai atu i le Tala o le Tupe e le o lava se vaegatupe aua lau Matagaluega. O lea sa faatagisia ai e le lou nei sui usufono se tupe faaopoopo, ona o le tulaga lea e vevesi ai nei lau Matagaluega i totogi o fomai.

Lau afioga i le Minisita, e pei o le agaga lena o lou tulai atu, ona o se popolega i lou sui usufono, e le o se tala vane ai lau afioga i le Fofoga Fetalai. Ona o anapo i tatou tala fou, ma nei i le taeao e faateia au, atonu e faateia uma le atunuu, ona o fuafuaga a le Sosaiete a fomai, o la e faapea e faataunuu i le sefululua i le po, masalo o le po a taeao, pe afai e le settle le mea lea. Ae o le agaga tonu lea ua ala ai ona ou toe tulai atu, lau afioga, e le se tala vane ai, o lea ua silafia uma e le atunuu, na sau nei i news. Se i ave se faamuamua lau afioga i le tulaga lea, aua silafia foi lau afioga ma le mamalu o lenei Maota,..

**Afioga Hon VALASI LUAPITOFANUA TOOGAMAGA TAFITO SELESELE:** O lea ua maua....

**Afioga Peseta Vaifou Tevagaena:** E le o i tatou o ni fomai, o se auaunaga e faigata tele. O le popolega lea e ia te au o le mamalu o le atunuu o lo o taotoo i le falemai ae tulai mai le faafitauli lea. Se i silasila ifo I le tulaga lea e ave i ai lau faamuamua.

**FOFOGA FETALAI:** Ia malie mai le sui usufono, o lea ua fai atu le Nofoa, o lea ua maua lou finagalo. O lea lava e faasolosolo le saunoaga a le Minisita. O lea e saunoa muamua le Minisita se i faamalamalama le mea na tupu, ma faasolo atu lava i le mea lea e te finagalo i ai. Ae onosai mai se i faasolo pea le saunoaga a le Minisita. Lau afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Lau afioga i le Fofoga Fetalai e ava tele i le tulaga e pei ona i ai, ae matauina e le i saunoa i ai le sui usufono. O lea ua alo i le faapea sa ou le fonu. A o lea lava e i ai e, e faamaumaugaina ia mea sa laga. Afai sa e fesili i le Minisita o Tupe, ia se i tali la le Minisita o Tupe. E te le i fesili mai i i, i le Minisita, aua e te faoloataua ma au lauga, e te fiu e fai le mea lena, e le maua ai sou ai.

**FOFOGA FETALAI:** O lea ua maua atu lau afioga... le sui usufono mo Faasaleleaga 5...

**Afioga Peseta Vaifou Tevagaena:** O lea sa ou lauga i le Tala o le Tupe, na ou taua ai le vaegatupe e tuuina atu i le Matagaluega, i le tulaga la lea ua tulai mai. Lau afioga i le Fofoga Fetalai, o lea sa ou lauga...

**FOFOGA FETALAI:** O le sui usufono lea o Faasaleleaga 5, le sui usufono lea... e toe tasi lau tala e fai atu ia te oe. Ua fai si ou le mafaufau. O lea ua manino aua sa taua i lau saunoaga, o lau lauga i le Minisita o Tupe, ae o lea e saunoa le Minisita e te le i lauga i le Soifua Maloloina. O le mea lea, e manino lava mea e faamanino. O le a ou toe faamagalo atu ia te oe i lenei aso. Saunoa mai lau afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Ia faamagalo pea le sui usufono aua ne i i ai se mea e tupu ai. Lau afioga i le Fofoga Fetalai, o lea sa manino le faamanino atu o le tulaga ina ia manino le sui usufono, o le mafuaaga lea ua feteenai ai... ua le mafai ona toe fia o i lalo e tauave ia totogi masani, faatonu a le PSC. E leai se power o le Minisita, o le mea e i ai le PSC, e i ai ma le Minisita. E leaga o le tulaga ua faamanino mai, o la e faafofoga mai lau Matagaluega, ma ou te le fefe foi e tau atu le mea lea. Aua o le mea lea sa tupu, ua leva ona tatau ona merge, ua leva ona tatau ona usitaia. Ae o le mea lea, e pei ua fao malo i le tulaga e pei ona i ai.

O lea la ua ou talanoa atu, o le Minisita a le Matagaluega, ia e le faafefea maia le Minisita i na tala ma na upu. O le faitalia na tuu e le Atua i le tagata, ia faitalia ia. A o le tulafono ma mea e fai e le Malo, o lea ua talanoa ai le Minisita i le taimi lenei. O lona uiga, o lea sa faamalamalama atu, ua leva ona tatau ona tupu mea ia, a o lea ua oo mai i lenei vaitau lenei, o lea foi ua toe laga. O le fesili, afai e lau mai e toatele i fafo, afai e tele... a outou silasila i le graph o le taimi na afua mai ai le faamamatoto i le 2005, e alu i luga e leai se alu i lalo. O le fesili lava, o le a le mea o lo o fai?

Ou te le alo i se ata o se laau, ma afai e inosia le Minisita lenei e tautala... e faalagi au o le sao o le Matagaluega. O lea ua tautala faasao ia Valasi i lana Matagaluega. Afai o faafofoga mai, ia tuu le mea valea lena e aua le faia, ia tuu. O lea la ua ou talanoa atu, afai e i ai outou e faaaua le mea lea, ia o lena ua ou fai atu, afai foi e i ai nisi e sauni o le polokiki lea e maua mai, talai ou ofu, ae alu e taumafai mai e run mai faa-faipule.

Ae o lea ua ou talanoa atu, e matua mausali lou talitonuga, ia toe foi i le faavae o mea, ua leva ona tatau ona merge. E pei o le mea lea ou te fai atu ai, e na ona omai lava fai mai o le a merge, omai faafefe le Minisita, liliu atu... A o le taimi lenei, o lea ua faalogo mai le Matagaluega, ua uma foi ona ou fai i lau CEO, a leai le fomai e sainsi taeao, le Aso Toonai pe afai e

faataunuu ia mea ia, ia faitalia ia. O le tele ia o le mea lea ua ofa i ai e le PSC, e 60% e ese mai i totogi masani, o lea e faaopoopo i ai ma o latou alauni o responsibility allowance. Ona faasolo ane lea i le isi vaega e 40%, 30% e lavea ai foi ma tausii soifua. O la ua outou vaai i le pepa o la ua faafetai mai tausii soifua, i le manaia o le mea la ua i ai. Ae pei ona ou fai atu, a faaopoopo ma allowance i le pasene lea, e faifai mai luga le totogi, \$190,000, \$180,000, a o tatou e le i oo i lena mea.

O lea la ou te fai atu ma lou lototele, afai foi o le mea lea e faapea mai ai, ia faamalolo le Minisita, ua ou talia. Ae o le mea moni, aua ne i fefe le mea moni, e leaga o lea e faafofoga Samoa. E faapea Samoa ai...e ofo Samoa i le mea lea. O isi fomai, e on call ae telefoni mai i le fale, ae le sau e vaai le mai, o mea la e tutupu, tulaga o mea ia. E le faapea la ua ou faaleaga, o au e ese lou alofa i le Matagaluega. Ae a oo loa ina saili le mea moni, o lea e faafofoga mai, e faitalia o lena e i ina le tagata. Aua e pau lea o le mea na tuu e le Atua i le tagata o le faitalia. O le ala lea o le amata o lau tala...

**FOFOGA FETALAI:** Ia malie lau afioga i le Miniista se i tuu atu le avanoa i le Tamaitai Palemia.

**Afioga Hon Fiamē Naomi Mataafa:** E na o lou fia faaopoopo atu i le mataupu a le Minisita o le Soifua Maloloina, ona e vaavaalua ma le Komisi e pulea le aufaigaluega a le Malo. E tau ina faamanino, o le Komisi, e feagai ma le Pulega o le Matagaluega o le Soifua Maloloina. O tagata faigaluega uma i lalo o le Matagaluega a le Soifua Maloloina, o lo o i ai le vaavaaiga a le Pulega ma le faamalualuga a le PSC. O le tau aumai o le Sosaiete o fomai, ou te fia faamanino i totonu o le Maota. Lau afioga i le Fofoga Fetalai ma sui usufono mamalu o le Palemene, e le talanoa. E le talanoa, le Komisi e pulea le aufaigaluega a le Malo ma le Sosaiete. E talanoa le Komisi ma le Pulega o le Soifua Maloloina. O mea ia e ao ona manino lelei i le Maota lena. Ma o le toe faatulagaina mai e le Komisi e pulea le aufaigaluega a le Malo, ina ia aloalosa ai, i le mea lea e tupu ma ou tau faalogo atu i ai, o le faaoloataua o vaega eseese o le atunuu. Ae fai le fua o le galuega i le mea e gafatia i le tamaoaiga o lo o tatou i ai.

E lelei le tala a le Minisita lea e fai, fai mai e \$190,000. Lau afioga i le Fofoga Fetalai, ua oo i luga i le \$400,000, ua oo i luga i le \$600,000, tupe ua faaalu i le tagata e toatasi. O le mea lea e fia faaali atu i lau afioga ma le mamalu o le tatou fonu.

**FOFOGA FETALAI:** Ia malo saunoa i lau afioga i le Tamaitai Palemia. Tulai mai lau afioga i le Minisita, o lea ua manino atili lea tulaga.

**Afioga Hon VALASI LUAPITOFANUA TOOGAMAGA TAFITO SELESELE:** Ia faafetai i le Palemia i le fesoasoani mai, e moni lava au, o

le agaga tonu lea e pei ona taumafai atu ai. E masalo faatoa faafofoga lea o le Maota ua ese le lauga a le Minisita. O le mea moni, e le faauiufia se mea ua leva ona tatau ona tupu. O le mea sa tauave mai le suamalie o le faaaogaina o nei tupe. E moni lava le Palemia, o nisi o alauni ia, o junior doctors. A o le au sinia, e \$500,000 \$600,000 i le tausaga. O lona uiga afai o le a tatou alu ai i le tulaga faapea ma le tatou faatuutuu i le tulaga e pei ona i ai. Ia talofa e ia Samoa, talofa e. O le agaga moni e le o se faaleaga i le aufaigaluega, e le o le aufaigaluega uma. O le matua fialia lava o le toatele o isi i le mea lea ua avatu e le PSC . E faafetai i le Komesina ma le PSC, malo lava galulue, malo sailimalo, faafetai toa, faafetai lototele.

Sa o tatou feiloai, o le agaga o lenei Minisita, tatou o e faaali le mea moni, fialia ai le Atua, ae tatou te le faalafi. O le ala lea o le amata ai lau talanoa, e afua mai i aiga nuu, ekalesia o le tautua. Ma le faamanuia a le toaina ia te oe pe a fai feau o le tausamiga. O lea ua mafua ai ona outou saofafai ma tatou alala i totonu o le Maota lenei. E mafua i se? O le tautua le faalogologo tigo. E tasi lea galuega po o lea tiute e faatusaina i le faaola o Iesu, o le faaola, o le lima taumatau o tatou. Afai la.... tatou vaai i le mea lea ua fai nei, a tatou tuu la i mea...

Lau afioga i le Fofoga Fetalai, o le issue tonu lea sa fia taumafai atu, o le agaga ua manino, o le mea ua leva ona tatau ona fai, ma o le me aua leva ona tatau ona faatonutonu ma faasao, ia le tulaga e pei ona i ai le faatulagaina.

O lo o i ai foi le taumafai mai a le Soifua Maloloina, i le Faalapotopotoga o tamaitai tausi soifua. O structure ma mea uma faapena, o lea ua faafofoga le PSC, ua uma foi ona matou fetufaai, e tasi lea galuega latou te asiasi atu. Ae ou te faafetai i le PSC, toetiiti tolu i le fa vaiaso o galulue i le Ofisa o le falemai i Motootua, ina ia tau faafoia le faafitauli.

E faamalulu atu i lau afioga i le Komesina, aemaise foi... ia ae le o ni Ofisa ane ai na o i le Matagaluega, o faatumutumuga lava o le Komisi, lea sa latou talanoa.

Lau afioga i le CEO o le Matagaluega, ia e lototele, ia maua lou toa mai le Atua. O le tofiga ua tuu atu i ou aao, ia malu Samoa. O oe o le Laau na Fausia, e le tau faamatalaina uiga o na mea. Ia laveai ia Samoa. Ua uma foi ona talanoa i le Ofisa Sili o Pulega, o le taimi nei, ia amata ona talosaga ia fomai mai Initia ma Saina ma nisi atunuu, se i omai e tautua la le tatou atunuu, ae se i matamata pe matagofie le aumai o tagata mai fafo e tautua Samoa, a o lea lava e naunau i le oa ma tulaga faapena. Ae le o ni tamai tupe lea e tuuina atu i ai e le tatou Malo.

Ia, lau Afioaga i le Fofog Fetalai, ne i umi sou taimi, ae ou te faapea atu i le Matagaluega, o le a se tou faafofoga i le tou Minisita, e faamalulu atu, e tatau ona ou tautala i le mea moni i totonu o le Maota lenei, ae aua ne i faalafia se mea e tasi. Ia, leaga o lea ua tulai mai le sui usufono o Siumu.

**Tofa Hon Tuuu Anasii Leota:** Lau Afioga i le Fofoga Fetalai, pe maua se avanoa faamolemole.

**FOFOGA FETALAI:** Se i tulai mai le sui usufono o Siumu.

**Tofa Hon Tuuu Anasii Leota:** Faafetai i lau Afioga mo le avanoa. O au sa ou matua usitai lava i le finagalo o le Minisita seia maea lelei lana folasaga ona faalavelave atu lea. Ia o lea la o le a ou faalavelave ae o le a faapuupuu leaga ua vave le tatou taimi. Faafetai ona o mea uma ia, o le tele o mea ia na saunoa i ai le Afioga i le Minisita, o mea uma ia sa taua i lau lauga, o tatou faata lea o le ave i tua, faafetai o lea ua tali manino mai, aemaise foi la o tatou vaega ia o Specialists po o specialized services, pe isa out aua ai le fomai mata e toatasi, ia o se tatou fomai foi lea e taotoina tino o tagata maliliu. Sa ou taua ai le fomai sa ave leiloa po o le a le mea ua oo i ai, le taimi lea po ua lima tausaga talu ai. Ia, ma isi tatou auunaga ia e le o lava, e i ai le Chiropractor. Ia e faafetai o lea lava ua manino le saunoaga a le Minisita o le a ou le toe faafesili i ai. Sa ou taua foi la le tatou fale lea e \$3 miliona lea o le a fai ai tatou taotoga ia e aumai mai fafo, e manaomia le tataua ona i ai o tatou masini faaonaponei. Ona ou manatua ai lea lau Afioga o lau faafetai na avatu i le Afioga i le Minisita i lau alu lea na ou alu ai e fai lou taotoga i lou mata. Ou te taunuu atu i o ae...

**FOFOGA FETALAI:** Ia, ua i ai le manatu ona o lea ua tatou oo i le tatou taimi malolo, ae se i tatou foi mai ona faaau lea o lau faafetai i le Afioga i le Minisita.

O le a faataatiaese Galuega a le Fono Aoa mo le 15 minute mo le tatou malologa.

*Na faataatiaese Taulumaga a le Fono Aoa Faitulafono mo lana malologa i le itula e 3:30 i le afiafi ma toe amatalia i le 3:54 i le afiafi.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.

E faataatiaese tatou taulumaga mo le malologa o lo o tulai mai le faauilavea a le sui usufono mo Siumu.

Ou te tapa ma le faaaloalo le sui usufono mo Siumu. Ou te fautua atu foi i le sui usufono mamalu e lelei ona aloaloese lau saunoaga ma le toe tau tolaulau o mataupu ua uma ona e saunoa i ai, ae toe fia fesili i ai, ae manaia ae agai sao loa i le mataupu o e fia faauilavea ai.

Tulai mai lau Afioga i le sui usufono mamalu.

**Tofa Hon Tuuu Anasii Leota:** Faafetai i lau Afioga i le Fofoga Fetalai, faafetai foi o lea ua maea palegaauau le taliga o le sua aua se faamalositino i lau Afioga ma le paia maualuga o le Maota nei. Ae faafetai mo lou avanoa. Ia e moni lau saunoaga o le a le toe taua vaega ia, ae pei ona ou taumafai atu e taua le mea lea sa ou malaga ai i Niu Sila. Ou te taunuu atu ae faapea mai toe 3 vaiaso fai lou taotoga. Ona ou fesili atu lea po o le a le mafuaaga ae fai mai o lea o le a malaga mai le team lea na omai ia Me, lea o le a malaga mai pe toe 3 aso.

Ona ou faafesili atu lea i le alii fomai, ae talanoa mai le tagata o le palagi le mea, ae fai mai o ia o le Samoa o lona tina o se Aleipata ea. Ona ou fai lea i ai, ae a la pe a matou malaga mai i Samoa ou te taoto i Samoa i le latou team lea e omai. Ae saunoa mai le susua i le Fomai, e manaia lava pe a taoto oe iinei o lea e lelei masini. Ia, mo le silafia lava e le Maota nei, pe 3 lava falemai na faatonu au ou te alu e vaai e siaki ai ou mata, ae eseese mamao lava falemai ia i Aukilani lava. Ona aumai lea o le faatonuga i le fomai lea, si tama lea, o lea o le a taoto oe i le Aso Gafua, Aso Lua, Aso Lulu malaga mai loa i Samoa le team lea na omai. O se tala fiafia lau Afioga i le mea lea sa fai ai lou taotoga, e tasi lava le taotoga i le aso, e taoto uma ai mata e lua. E tai 20 minute e koma ai ona toe taoto lea o le isi mata. Na o le tasi lava le itula na ou nofo ai i le falemai ou sau loa i le fale. Faafetai lava i le manaia o taotoga ia lau Afioga.

E pei o le mea la lea ou te taua ai mea ia o masini, i tatou falemai lea o le a fau mo le aumaiga o fomai mai fafo. E tatau lava ona i ai ni masini. Ae ou te vaai i masini ia na ou vaavaai ai i fafo, ona ou vaai lea i masini mata ia iinei, e le taitai lava ona faatusalia. Ona o le tatou lava limavaivai, ae pei o tulaga na lau Afioga e taua ai tulaga e pei ona i ai.

Ae momoli atu lava le faamalo ma le faafetai i lau Afioga i le Minisita i faafitauli foi na tulai mai. Faamalo le onosai. O nei faafitauli e le o ni mea fou, o mea ua leva. O lau Afioga foi ona o tulaga ia ua saunoa manino i ai, o le merge lenei lea ua mafua ai, ona o mea foi sa le mafai ona faatinoina foi i le matou faigamalo na i ai, a o lea ua tau mai i lou taimi, lea ua afaina ai lau Afioga ma le faigamalo, ae faafetai. O le tulai mai o lau Afioga, o le matua toa lava. Malo o lea ua e saunoa manino lava i tulaga uma, o lena ua e aumaia, e te le fefe foi i tulaga uma. Ia na o le manualii lava e faafefe i le aveau ae malo le toa.

Ae o si mea lava lea lau Afioga pei ona ou tulai atu ai, sa ta feiloai, na e saunoa mai, vave tuu mai sau talosaga mo le matou falemai. Ia lea la ua faapea ai ua galo i lau Afioga si ou matou falemai, ia atonu foi e aoga, o le a sou finagalo i ai pe talia le matou falemai, leaga o la e faafofoga le matou itumalo na saina uma lava le toatele o matai, e aumai le matou talosaga i lau Afioga.

Ia lau Afioga i le Fofoga Fetalai, faafetai mo le avanoa. Manuia le Fono.

**Tofa Ale Vena Ale:** Lau Afioga i le Fofoga Fetalai...

**FOFOGA FETALAI:** Se i tulai mai le sui usufono mo Faleata 4.

**Tofa Ale Vena Ale:** Faafetai i lau Afioga i le Fofoga Fetalai mo le avanoa. Ua ou tulai atu ma le faaaloalo tele, ona o le saunoaga a le Afioga i le Minisita, o lea foi ua tanoa le Afioga i le Tamaitai Palemia, ona o le tulaga i le taumafai atu a le Matagaluega ma le... Lau Afioga i le Minisita, malo lava le lototele, faafetai foi i le Malo mo le taumafai e foia. So o se mataupu e faalala mai i se Matagaluega e solotetee, faafetai i a outou Afioga. E le o se mea faigofie i le faigamalo pe a tulai mai le tau faaaliali mai o se Matagaluega e solotetee. A o le matau atu la o lea foi ua saunoa o le Afioga i le Tamaitai Palemia i totogi ma mea faapena, ia malo faafetai. Faafetai. O le matafaioi lava lena a tatou o Taitai o le atunuu, ae momoli atu le faafetai tele lava. O le agaga lena o le itumalo o Faleata 4 aua le faafitauli o lo o... Malo toa faafetai. Manuia tele toe taimi o totoe o le tatou fonotaga.

**FOFOGA FETALAI:** Malo faafetai. Mo le faasaoina o le taimi o lau Afioga, se i tulai mai le sui usufono o Sagaga 2.

**Susuga Maulolo Tavita Amosa:** Faafetai i lau Afioga ona tasi lenei mataupu sa ou laga lea na foemua ai le saunoaga a le Tamaitai Palemia i le mataupu lenei. Faafetai tele i le faamalamalamaga a lau Afioga i le Minisita o le Soifua Maloloina. E le taumate ua logo i logo a le faafofoga a Samoa atoa i le mataupu lenei, le mataupu o lo o nofo faatali ai foi le atunuu po o le a sona taunuuga. Ua manino foi lau folasaga. Malo. Pau lava le fesili lea ua oo mai, pe na faapefea ona le pick up e Okika a le Malo tulaga ia, e maoae lava. E faateia foi nei ituaiga overtime faapenei. Ae ui i lea, e aoga foi mea tutupu e mataala ai foi tatou o e faia Tulafono mo le agai i luma.

A o si toe tuualalo a lou nei sui usufono o le itumalo o Sagaga 2, faimalu ou faiva, seu silasila i le soifua o le atunuu, o lena e i ina le tofa. Faafetai.

**FOFOGA FETALAI:** Ia, malo. Se i tulai mai lau Afioga i le Minisita.

Oi, ia malie lava se i tulai mai le sui usufono tamaitai mai Aleipata Itupa i lalo.

**Afioga Faagasealii Sapoia Feagiai (Sui usufono tamaitai – Aleipata Itupa i Lalo):** Lau Afioga i le Fofoga Fetalai, faafetai mo le avanoa. Ia e momoli le faafetai i lau Afioga i le Minisita e tusa ai foi mo le folasaga matagofie. Ia o mea uma lava ia e tofotofoina ai lou faatuatua. A o lea ua vaai atu ua matuai tele lou faatuatua, viia le Atua.

Ia, ona sa faalogologo atu lava i le mataupu lea i alauni ona faapea o lea ua talia e le Sosaiete a Tausisoifua, ia, faafetai. Ae i ai aiaiga sa toe fetuunai ai

le Sosaiete ma le PSC, ia o lea ua ala ai ona talia e le Tausisoifua ona o lea o le a toe faamatuu mai latou ovataimi i le mea sa i ai, o le a one and a half le aso Toonai, ae double time le Aso Sa. O le mea lena lea na talia ai e le Tausisoifua. Ae o lo o talosaga ina ia faapepa, e manaomia le faapepa mai o ia fetuunaiga ma le faaaloalo.

A o le tulaga foi i le mea lea o le merge, e pei ona saunoa lau Afioga, o le isi vaega tonu lea na ala ai ona tupu le mea lea o le merge, ona ua vaai atu Tausisoifua ua leai se latou avanoa foi lea i le structure a le health. O lea na ala ai ona tonu i le manatu o le Tausisoifua ia toe tuufaatasi, toe merge ina ia tumati'e mai lava Tausisoifua. O le mea foi la lea o lea e uia soo ai lau Afioga e Tausisoifua i le structure lea a nurses, ia tumati'e lava nurses, ia aua ne i lalo o se pulega a se isi section a ia tumati'e lava latou ma le latou taitaiga. Faamanuia le Atua i lau Afioga.

**FOFOGA FETALAI:** Malo faafetai. Ia, lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai. Faafetai tele i lau Afioga i le Fofoga Fetalai aemaise foi faauilavea. Faafetai i lau susuga i le sui usufono mamalu mai Siumu. Malo faafetai.

O le soifuaga o lo o tatou ola ai, e ese le manaia i le vaavaai, o nisi taimi e toetoe lava a faaosofia tatou e le tiapolo. E i ai taimi e tulai mai ai faigata, ia ua taumafai foi le fili e... O le faafetai mai, leai e faafetaia le Atua ona o avanoa e tuuina atu pei ona tatalo atu. O le agaga sili ona taua, aua ana le vave avea ou fofoga, semeamanu faapenei ua autago ou aao, leaga e taua tele na mea, aemaise o lo o i ai tofiga taua ia i tatou. E moni lava i Tulafono, ae i ai lava discretion e ao ona fai ai na mea, e pei ona faaaoga soo e nisi o tama, o le tofamamao aemaise foi le faaaogaina o tulaga e pei ona foai mai e le Atua le mafaufau lelei ia i tatou. Faafetai. Faafetai mo mea uma.

E moni a au, o lea ua ia te au le tusi a lou itumalo, ia o lou itumalo o lo o i luga i le lisi muamua lava i le faagasologa ma Fagaloa. E ui ina e le i lauga Fagaloa, a o lea e i ai faatasi ma Vaimauga lea e le o nofo mai. O lo o i ai foi faafitauli o lo o taumafai e logo i sui usufono ia aumai le atoaga o le maliega o eleele pei ona faatulai mai i nisi, ae taua tele le...

Ia, faafetai i le tuafafine po o le Afioga foi i le sui usufono mamalu. Ia aua ou te talitonu o lo o finau lava ia aua o ia o le tausisoifua litaea, aemaise foi o lea ua faaeaina i le tulaga o tofiga. Ma e o lau Afioga i le Fofoga Fetalai, e le ma le gutu e tautala, tasi lea Matagaluega e ese le feainai o tagata, o le mea moni lava. E leai se toafilemu. Ai ona o le tetele o mafaufau o tagata ma atamamai. E ese le maoae o le finauga i tulaga e pei on ai ai. E le mafai ona ou alofia na mea, aua o le tele ia o faafitauli e tau foia ma tau fofo i tulaga e pei ona i ai. Ae le mafai ona ou alofia na mea, aua o le tele ia o faafitauli e tau foia ma tau fofo i tulaga e pei ona i ai. Ae faafetai o maua pea

le malosi ma le ola, ona sa ou folafola i lau Matagaluega, e le o au o se fomai, o au o le tausiaiga, na afua mai aiga le tautua, aemaise o lea lava ua maua ai manatu ma lagona. O le ala foi lea o le saofai atu i lenei... ona o le finau, tautua ma le faamaoni.

O le ala lea lau Afioga i le Fofoga Fetalai, e le aveesea se manatu, tasi lea Matagaluega o le matua tele o faafitauli, ae o lea lava e fofu malie, i tulaga e pei ona i ai. E atamamai tagata, e maoae le tomai aoaoina, a o le tofa e teu ai se mea, ia, ou te talitonu o le meaalofa lena mai le Atua.

Ia, lau Afioga i le Fofoga Fetalai, e ese le taua o le i ai i totonu o se Matagaluega faigata. O lea lava tou te vaavaai mai e pei e malosi le tino, ae faapea mai le isi aualii, se o lena e te malosi lava Valasi. A o le agaga sili ona taua, a tele le loto o le tagata, e malosi foi le tino.

Lau Afioga i le Fofoga Fetalai, o la e faafofoga mai le Matagaluega. A matou talanoa ma le Matagaluega, e leai... fai atu, aua tou te faamamalu mai o au o le Minisita. Tatou tausua, tatou talanoa, ona o le agaga ia fia maua, ia fesootai upu ma tala e ala i le sua atu sua mai. Ia o isi lava sui e pei e faalefia sua faapena, e le masani i le soifua i tulaga o le tautuaina o mea nei o aiga.

Lau Afioga i le Fofoga Fetalai, ona oo mai lea o sau faamatalaga i nai mea laiti ia e lua, o le kanesa. E tasi lea mea sa talanoaina e nisi o sui usufono, o lo o ua i ai fuafuaga faataatia a le Matagaluega e faavaeina se ofisa tutotonu mo le gasegase lea o le kanesa i totonu o Samoa aua suesuega ma togafitiga o lea gasegase. O lea ua i ai fuafuaga, aua o le mea la e i ai nei o le Cancer Society, a o se ofisa lava faapitoa e togafitia ma le vaaia ma le silasila totoa i lea vaega o gasegase, ia o lea ua i ai i totonu o le polokalame a le Matagaluega.

Ona ou oo mai lea i le sikareti foi lea faaonaponei lea e pisa ai... aua e lavea i lalo o le Tulafono o le Tapaa. E tutusa lelei lava le treat ina o le tama lea, le sikareti lea sa pisa ai nei le tatou Maota, ia ma le treat ina o le tapaa masani lea i lalo o le Tulafono. O lea la e i ai le talitonuga, o lea foi ua tilotilo totoa i ai ma vaavaai ai foi le Matagaluega, aua o lea e aafia i lalo o le Tulafono o le Soifua Maloloina.

Lau Afioga i le Fofoga Fetalai, a i ai se isi manatu po o se isi lagona e le i afea i se talanoa, a o le vaavaai i lenei itula sa ou fai atu talosia ia uma le lauga ae lei ta le 5 aepeitai o lea ua tea le 4. E i ai le mataupu lea ua galo ia te au.

**FOFOGA FETALAI:** Malie lau Afioga i le Minisita, se i tuu atu le avanoa i le sui usufono mo Vaisigano 1, lea ua faauilavea mai.

**Afioga Niuava Eti L Malolo (Vaisigano 1):** I lea ua matau atu o lea foi Sina i Futu, ua faaiuiu le saunoga a le Afioga i le Minisita ae i ai le tulaga foi lea, e i ai mo mea o collective responsibility a sui usufono o Itumalo le

ala lea o le tulai atu. Ia e manatu o lea e augata se finagalo a le Afioga i le Minisita ona sa ou laga le Fale Failele lea i si o matou Itumalo. E musu e faalavelave ona o lo o tele le tuatuagia o le Afioga i le Minisita, a o le matou galuega lea faa-sui usufono o le Itumalo e oloolopitovaa i le Afioga i le Minisita.

E le gata i lea aua se ward mo tamaiti ona o lo o faapea ona taofia faatasi tamaiti ma tagata matutua. A ou te manatu o lea ou te vaai atu o lea e i ai le seleni i totonu o le Tala o le Tupe ia ai o totonu i i le vaega lea, ma le tulaga foi o nai fualaau ona e mamao tele le ta Itumalo e agai mai Upolu i latou i taimi e sioki ai fualaau. O se toe soso atu lea e faalavelave atu a o alo le saunoaga a lau Afioga i le Minisita.

**Afioga Masinalupe Makesi Masinalupe (Lefaga ma Faleaseela):** Lau Afioga i le Fofoga Fetalai...

**FOFOGA FETALAI:** Ia malie lava lau Afioga i le Fofoga Fetalai se i tuu atu le avanoa i le sui usufono mo Lefaga ma Faleaseela.

**Afioga Masinalupe Makesi Masinalupe:** O le faalavelave, lau Afioga i le Minisita na ona toe faamanatu atu, o le vaega lea po o finagalo ai lau Afioga i le Minisita e tusa ai e pei ona taua le medical health insurance po o lagolagoina po o le a le tulaga o lea vaega ia atoa ma se tau faailoa atu mo se matou falemai mo le matou Itumalo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Ia se i tulai mai lau Afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Faafetai mo le avanoa. E le umi se faauilavea lau Afioga i le Minisita ae ua talitonu foi o lea ua faaiuiu lau saunoaga faamalamalama. A o au foi lea sa tautala i le vaega ia ua maea ona e saunoa i ai ma sa amata ona tomua sau tala i le aso lea na ou lauga ai. Sa ou nofo ma ou tatalo i se fofo o le gasegase ua tulai mai, faafetai o le agaga faafetai i le aso, o lea ua tautino le solo a le tamaloa, tulou o lea ua aumai mautinoa ma o mea foi ia e manaomia e le tatou atunuu ia nofo malamalama i ai.

E faaluafesasi foi le aumaiga e pei ona e saunoa lea la ua taoto le Maota, la foi e faafogafoga mai le atunuu malo faafetai. Pau lava lea ua ou tulai atu ma le faaaloalo ona e lea e pei e maua po o taeao ea lea e i ai le faamoemoe lea o fomai, a o se fuafuaga la mo nisi la e foi suia latou, nai o matou Itumalo e pei o i e autovaa mai ai i le tatou Falemai i Motootua i le matou... a lea Itumalo. Ia atonu o faapena foi Savaii agai Tuasivi. A o le agaga lena ma le

tatalo ina ia faafuaseia ae moni le i ai o falemai Tumaoti i tua, e i ai foi le au limavaivai ma le au le tagolima. E pei e fiafia e agai i i ona o la e faalelava le faasoa. E pei o le agaga lea po o ua i ai se fuafuaga a le tatou Matagaluega ma lau Afioga.

Ae pei ona agiga i le suanoaga foi a le sui a Sagaga 2 e faapena foi se lagona e faaoololomaau se lagona e ui a o lea ua mautinoa, saunoa foi le Afioga i le Palemia ae le tuua ai foi sa matou tuualalo. O le agaga lena e valuvalusia ai aa o le laau, se i toe tagatagai pe i ai se isi avanoa ona e manatu i lenei Itumalo ma le lautele o le atunuu. O le matou faaoololo maau lea ae se i ooloo pitovaa se i tautuana, o lena e i ina le tofa e le faatonua foi e matou le tofa, ioe. E faapena se lagona.

E le aoaia foi e Laupua Tamafaiga o lena ua i ina le tofa ma le uta matou faamoemoe atu , afai o i ina e manuia ai tatou ae afai o se isi itu o le matou tatalo lena. Pe mafai ona toe fetuunai le tofa pe maua se isi avanoa, a leai, ia faafetai.

**FOFOGA FETALAI:** Ia o lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai lau Afioga i le Fofoga Fetalai. Faafetai foi i le Taitai o le Itu Agai mo le tuualalo, ua silafia e le Atua e leai se agaga ae ou te talitonu o la e talitonu le Taitai o le Itu Agai e tupu ni mea faapea. A o le talitonuga o Valasi o la e soifua le Atua e pei ona fai atu o le tagata na fau e le Atua na tuu mai ma le faitalia, ma e le mafai... E pau lea o le mea e le mafai ona taofi e se isi o le loto o le tagata. Ua na o le Atua na te silafia mea uma, ae faafetai mo le tuualalo, ia sa tupu foi mea i na vaitau sa i ai foi strike sa tupu i le taimi o si toaina o Tuilaepa vaeatu lea... tiga foi ona talanoa atu i le tama o le atunuu i tulaga ae sa tupu a. O lea a le mea na tupu mai? Ua alu alu a ua fiu e strike ua te i a ua toe fia... A o le agaga sili ona taua se i tau atu e leai e moni lava tatou sailiga. O le mea moni e le o le Matagaluega ma Fomai, o Fomai ma le o lo o vaaia latou o le tagata faigaluega a le Malo le PSC. Lea la ua talanoa atu le PSC i tulaga uma ma Tulafono e tataua ona uia, lea foi ua uma ona talatalanoa e i ai le PSC ma offer i ai nisi o tulaga maoae i tulaga ae foliga lava e i ai a isi toetititi a... Masalo pe le atoa se na o le toalima tagata la pei ua tasiga ai ma nisi tagata. A o le talitonuga o la ua malilie uma le tele o latou i le mea ua faatulaga atu e le PSC.

Lau Afioga i le Fofoga Fetalai o le mataupu e pei ona talanoa mai ai Vaisigano 1. Faafetai Vaisigano, sa ou maua na e lauga malosi lava e na o le 2 moega faafailele ai avatu le... a o le suesuega i le ta Itumalo, ae na o le 2 moega ona e le fiafia tamaitai fananau soo i le tatou Itumalo. E pei e tasi lea Itumalo e ese le lelei o tamaloloa e fua lava le aiga fuafuaina. Ae aua e te popole o lea e te faafofoga mai o lea e faamuamua le ta falemai. I tulaga e pei ona i ai ia faiga o mea moni a o lea ua tautino le Maota lenei aua la e te

popole. O lea o le a faamuamua le falemai i Sataua ma ona vaega uma e tatau ona faaleleia, sosoo ma Satupaitea faasolo ai lea i isi, seiloga e maopopo mai ia lisi o fanua ma tulaga uma.

Lau Afioga i le sui usufono o Lefaga ma Faleaseela, o lea ua ou tago tusi i lalo, o le a faaigoa le insurance lea Masinalupe Insurance ae taatia mai so o se mea fou e agai mai, e tatau ona i ai ia sailiiliga maeaea ma faamautu lelei a o se mea taua tele lea ua laga. E tasi lea sui e ese ma le sogasoga lau Afioga i le Fofoga Fetalai, e tiga ona faigata mea e lagalaga ni mea e tatau ona... ae faafetai o le Falemai aemaise foi lou uso ia Aiga le Tai lea sa tatalo mai mo le latou fanua lea sa tuu e fai ai lo latou faamoemoe. Ia faamaopopo mai la outou tusi lena te i foi ua toe fai ae talepe e nisi e pei ona e saunoa, o manumanuga lena o le taofi, ae Masinalupe o lea na avatu lau tusi o lea ua lavea i le lisi. E pei e lona tolu oe ia Fagaloa ma o i Siumu i tulaga lea e pei ona ou fai atu, aua le popole e sau malama e oso pea le la. E le i fausia Roma i se aso e tasi.

Ia lau Afioga i le Fofoga Fetalai ona i ai lea o le manatu o le a seu i fanua le sa o le Matagaluega, lau Matagaluega e, ua outou faafofoga mai i tulaga e pei ona i ai po o le a foi se tala a le tou Minisita ia o le tala a le Minisita lena ua outou masani. Ia faalaulelei mea ua faaletonu, teuteu lou finagalo ma lou loto ia afio ai le Agaga Paia, ia amata atu nanei a ia e moe ma tatalo, aua o le tele o outou na ona matele i le vaaiga o mai, ae leai se taimi e tatalo ai. Tatalo i le Atua e aumai lou malosi.

Lau Afioga i le Fofoga Fetalai e tasi a si au faanoi ona o si ou Itumalo, e te le i faafofoga mai lava o fai sau tala i lou Itumalo. Lou Itumalo e, e pele i le agaga afai o tou faafofoga mai i se tala, na tou te talitonu na ou ola ane ma fanau i eleele o Sataua ana le aumai a i Apia i aoga e le iloa le mea tau o Apia. Ae tou te faafofoga mai i se tala a le tou sui usufono ia tatou te feiloai i le Aso Toonai. Ana leai le Tala o le Tupe tatou te feiloai taeao. O nai a tatou fuafuaaga ia tapena lelei aua ne i i ai se faaletonu aua foi ne i i ai se mea e gase. Tatou feiloai fiafia ae tatalo ia manuia outou aemaise foi le sui usufono. Ia maua la outou tofa, maua le faautautaga aua le tausiga o le Itumalo ma le tatou nuu.

E le tau talatalaina e Valasi upu ma tala o le tatou Itumalo o lea lava ua outou silafia o paia a mai le vavau e oo i le faavavau. Peitai lenei afiafi, faamalo faafetai i Minisita sa sausaunoa aemaise foi sui mamalu uma. E leai leai se mea o faaletonu i a outou saunoaga, faafetai timai, faafetai le tuualalo aemaise foi le Taitai o le Itu Agai malo faafetai. O lau tuitui mai ma lau tuualalo e malosi ai aemaise foi fautuaga leleli ae taatia mai aua le popole tatou tuu i le Atua mea uma. A o faafofoga mai foi le aufaigaluega ma le Matagaluega e faapena ona au le Atua i mea uma o lenei aso.

Alofagia e le Atua lau Afioga i le Fofoga Fetalai, maua le tofa maua lou malosi maua le soifua aua ou tiute ma ou faiva. Soifua ma ia manuia.

**FOFOGA FETALAI:** Ua faamalo malele, malo foi saunoa lau Afioga i le Minisita o le Soifua Maloloina. Malo lava mo le faamalamalamaina foi o nisi o mataupu sa lagalaga e sui usufono mamalu aemaise foi o le faamalumu mai o tulaga o Matagaluega. Ia malo le lototele, malo le onosai, malo foi le faatuatua i le Atua i le faamalamalamaina o nei mea uma, ia atonu o lea ua manino le Maota, manino foi le faafogafoga mai o le atunuu. O lea ua i ai tulaga aemaise foi o lea ua i ai le tulaga aua lava le faaleleia ma toe teuteu totogi o le afaigaluega malo faafetai. Ua tatou oo mai i le Minisita o Pisinisi, Alamanuia ma Leipa Hon Leatinuu.

**Tofa Hon LEATINUU WAYNE SOOIALO:** E faafetai tele lau Afioga i le Fofoga Fetalai mo le avanoa ua tuu mai aua foi Faalapotopotoga a le Malo aemaise Pisinisi, Alamanuia ma Leipa. Ia e muamua ona faafetaia le alofa o le Atua i lenei afiafi ua mafai ona tatou aulia mai lenei afiafi i Lona filemu ma Lona saogalemu aemaise foi le tapuaiga foi a si o tatou atunuu o Samoa. Ou te talitonu ua uma ona paelago lenei aso i fetalaiga foi ma lauga a afioga i sui usufono aemaise foi Minisita ua mafai ona lauga i lenei taimi. Ae o le a taumafai atu se taumafaiga a lenei Matagaluega e uiga foi i ni mataupu sa aumai e le tatou Maota mai le 2 po o le 3 vaiaso talu ai e pei ona tatou mafuta ai.

O le agaga lava ia lau Afioga i lenei Matagaluega e momoli atu le faafetai i afioga i sui usufono aemaise foi o tuualalo ma fautuaga ua tuuina mai aua foi taumafaiga a le Matagaluega lenei e le faigofie e pei ona outou silafia foi e 9 Vaega a le Malo o i lalo o lenei Matagaluega. O lo o taumafai lava le tulaga e gata ai ina ia mafai ona faatino le auaunaga ae tatalo atu le tatou Matagaluega ia tapuai mai.

E faapena foi ona ou tatalo atu le tatou Itumalo Faleata 2, i ai se taimi ou afe atu pe a maea le tatou auaunaga na tofia ai au i lenei aso, ona avatu foi lea o se faamatalaga aua le tapuaiga a le tatou Itumalo o Faleata 2.

Lau Afioga i le Fofoga Fetalai e le toatele i latou sa fesiligia foi lea Matagaluega masalo pe na o le 13 latou, Afioga i sui usufono na aumai foi ni fesili ma ni tuualalo e fesoasoani ai i lenei Matagaluega. E leai foi se agaga e umi se folasaga e leai foi se agaga e oo se folasaga e oo i se mataupu e le i afea i le tele o tatou Afioga i sui usufono. A o lenei aso e toalua i laua na fesiligia foi le Matagaluega lea o le Kamupani o le Samoa Airways po o le Samoa Airways. Ia o le a taumafai atu ai la se folasaga e amata atu i le tatou Kamupani Valele.

Ia lau Afioga i le Fofoga Fetalai sa fesiligia foi e le Taitai o le Itu Agai le tulaga ua oo i ai le tatou Samoa Airways ae le gata foi i lea e faapena foi Gagaemauga Nu 2. Ia o le a taumafai atu se faamalamalamaga lau afioga i le Fofoga Fetalai e uiga i le tatou Kamupani Vaalele.

E le tau faailoaina le tulaga na oo iai le tatou Kamupani Vaalele ina ua toe faatinoina le tatou pisinisi o vaalele tetele poo le tatou Jet Operation i le 2017

e oomai ia Iuni i le 2022 e sili atu i le 100miliona le gau o le Kamupani Vaalele, o se ootoga o tupe faaalu nai lo tupe maua o tupe ia e tau o tupe gau e faapea;

- O le tausaga 2018, e 14miliona le gau o le tatou Kamupani vaalele
- 2019, 26miliona le gau o le Kamupani Vaalele o le Samoa Airways
- Tausaga 2020, 34 miliona le gau o le Kamupani Vaalele
- 2021 3miliona le gau o le Kamupani Vaalele
- 2022 27miliona le gau o le kamupnai vaalele

A tuu faatasi e 104miliona le tulaga o le tupe gau a le Kamupani o le Samoa Airways.

Ona o le tulaga pagatia na oo iai tupe o le kamupani vaalele ma ua faagasolo ai ina gau atu ai ma le tatou Malo, na faatino ai loa ma le faaiuga a le Kapeneta ia Tesema 2021 i luga o le tapenaga a lana Komiti Faapitoa ina ia faamuta le lisiina mai o le vaalele sa faamoemoe e faaauau ai lea pisinisi. Na talafeuga foi le faaiuga a le tatou Malo ma le tapunia o tuaoi o faavaomalo ina ua aafia le lalolagi atoa i le Koviti 19. O le tau atoa i le faamutaina o le lisi i le manuia ai o fetuanaiga a le Soa Komiti a le Kapeneta ma le Kamupani e ona lea vaalele ia Iuni o le tausaga talu ai e tusa lea ma le 5.3miliona tala amelika poo le 14.6miliona pe a faatusatusa atu i le 16miliona amelika na amata ai le fetuanaiga. E iai le aafiaga o le Jet Operations poo vaalele tetele ia ua mavae atu oloo taumafai le tatou Kamupani vaalele e faamama mai i ana tusi. E tusa ma le 85miliona le aofaiga o ana aitalafu a le Kamupani, mai le 85miliona e 55 miliona oloo nofo aitalafu ai le ai le kamupani i le UTOS i lalo o faamalumaluga a le Malo. Ona o faamalumaluga ua faasee atu le nonogatupe e togitogi e le tatou Malo i lalo o aiaiga na faatino ai lea nonogatupe ona totoe ai lea o isi aitalafu e tusa ma le 25.3miliona.

O le tala faatatau o le tupe o loo talanoaina nei oloo iai se vaegatupe fuafuaina e tusa ma le \$4 miliona e fesoasoani ai i le kamupani ma ana galuega faatino ae faapea foi i le fesoasoani i le totogiina o ana aitalafu. Ua faalototeleina foi le Komiti Faatonu ma le Pulega a le Kamupani e saili auala e mafai ai ona totogiina le isi 21.3miliona o aitalafu.

E fia faailoa foi mo le silafia e le mamalu o le Palemene faapea le faafofoga a Samoa nisi o atinae oloo faaauau pea mo le vaega o vaa savili faapea le tatou Kamupani. O lo o faagasolo lava le galuega tele tatou Soa-Komiti ma le Faletupe o le lalolagi o le IFC poo le International Finance Corporation lea foi vaega o le tamaoaiga. E le gata i le iloiloga o maliega ma isi Kamupani vaalele o isi atunuu poo Air Service Agreement e saili ai ni auala manuia i lea vaega o atinae i le tamaoaiga, ae faapea foi i tagata femalagai, e le gata ao loo sailiili pea e le soa komiti ma le Konesale ni auala e unai ai Pisinisi a le tatou Kamupani Vaalele o le Samoa Airways.

Ona o lo o lagalaga mai pea e nisi o sui mamalu o le Palemene le toe aumai o se tatou vaalele, e iai te au tele le ava ma le faaloalo tele e faailoa atu ai le

finagalo o le Malo e le toe faatopetopeina o le toe aumaia o se tatou Valele lapoa nei toe palasi atu foi le tatou Malo i le lua lava le o aitalafu e pei ona sa sau ai i le 30 tausaga ua mavae. O lea foi e matau ma le totoia i fuainumera oloo tuuina mai o lo o lava femalagaiga a vaalele o lo o felelei i le va o Niu Sila ma Ausetalia o atunuu ia o lo o matauina ai le tele o tagata o lo o malaga mai mo Samoa nei, o lea foi ua toe amatalia femalagaiga a le Virgin Australia ia Mati o le tausaga nei i le tai lua malaga i le vaiaso

Ou te fiafia e faailoa atu i le mamalu o le Fono Aoao Faitulafono faapea le faafofoga a le atunuu talu ona faamuta le isi vaega pisinisi poo le isi vaalele tetele poo le Jet Operations i le 9 masina talu ai ua vaaia fualelei o lenei faaiuga i le faamauiina ai o se tupe faasili a le Kamupani Vaalele e tusa ma le 4miliona ia Mati o le tausaga nei. O nei tupe faasili ua maua mai ia tatou tamai vaalele o loo felelei i le va o Samoa nei ma Amerika Samoa. O le la'uina o uta faamomoli faapea foi ma galuega oloo faatinoina i Faleolo o le tatou Ground Handling lea. E ao pea ona mataitu lelei a tatou pisinisi i se tulaga e faaauauina pea le auaunaga ina ia faatuina ai aemaise aua nei toe aveia ia pisinisi ma avega mamafa i le Malo pe a faulai a tatou aitalafu ua le gafatia ona totogiina.

Lau Afioga i le Fofoga Fetalai o se faamatalaga puupuu lena i le tatou Samoa Airways o lo o iai le taimi lenei ae o loo galulue pea le tatou Komiti ua uma ona fautuaina foi le tatou Minisita ae le gata foi i lea o le tatou Kapeneta i ni auala e mafai ai ona alualu pea i luma le tatou Kamupani Vaalele. Ae ao ona ou fia oo pea i le tulaga o i ai ni faasalalauga...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai nao sina vaega lea e fia malamalama atili ai lava

**FOFOGA FETALAI:** Ia malie lau Afioga i le Minisita sei tuu atu le avanoa i le Taitai o le Itu Agai leaga o lea sa taua i lana lauga.

**Tofa Hon Lauofo Fonotoe Nuafesili Pierre Lauofo:** Ia e pei o le Sector lea sa agai iai la'u fesili ma la'u talanoa o le va lea o tatou ma Aukilani ao lea la ua saunoa lau Afioga i le Minisita e le'o iai se fuafuaga e toe aumai se vaalele a, e pei o le sa'o lea, ao lea e feutagai mai isi Kamupani Vaalele masalo o lea na taua e lau afioga le IFC (International Finance Corporation) aua e sao sa aumai ai foi le tatou vaalele muamua i le IFC, ao lea la e fesili atu a i le tulaga lea aua o lea ua iai le tatou Policy foi lea o le Open Skies poo le a la se tulaga o iai i le faatagaina lea o isi Kamupani Vaalele mo le vaa e pei o le va a lea e agai iai se tala ona e taugata tele le pasese ona e tasi a le vaalele lea e pei ona silafia. O le vaega la lena e pei ona ou talanoa atu ai, ia ma le tulaga la o le tatou Samoa Air ia faafetai e pei o lea e tau faalogologo atu o aitalafu ia sa tolaulau mai e lau afioga ae leo ni gau foi ia aua e pei o lau vaai, o la e lele le Samoa Air masalo ana gau e le toe lele, o

la a la e operate le vaa. Ao o atinae o la e silafia le tulaga masani ai mo atinae e nono mai tupe e faavae ai atinae ona faagalueaina lea o atinae e toe togitogi ia nonogatupe o le faamoemoe lena o soo se atinae atonu o lena foi e silafia e lau afioga o tulaga masani, ae e pei o le mafuaaga lena o le fesili atu poo le a se taimi lata mai i le va lea o tatou ma Aukilani

**FOFOGA FETALAI:** Ia se i tulai mai lau Afioga i le Minisita...

**Tofa Hon LEATINUU WAYNE SOOIALO:** Ia faafetai tele lava i le Taitai o le Itu Agai masalo e le'o malamalama i lo'u fai atu i le gau, 2018 - 2022 104miliona le gau, o le gau o le tupe lea o le faasiliga o tupe faaalu nai lo tupe maua, o le aitalafu e 85miliona. I le tulaga i le faafesili mai i le va o tatou ma Aukilani e pei lava ona ou faiatu e le'o faatopetopeina e le tatou Faigamalo i le taimi lenei nisi tulaga e tatou te fai paaga ai ona e leo lelei le tala o le tupe a le tatou Vaalele a le tatou Samoa Airways, a lea ua amata e pei ona silafia o lea ua toe ave le faamalumaluga i le 50miliona a le UTOs lea ua toe ave i le Malo ina ia taumafai e fesoasoani ai i le toe totogiina ae taatia mai le 25miliona e taumafai ai le tatou Kamupani ina ia togitogi. A amata loa mau i lalo tulaga ia o aitalafu, ou te talitonu e iai se taimi e mafai ai ona tatou talanoa i nisi kamupani vaalele, ao le taimi lenei le Air New Zealand lea e iai e pito sili ona .....

**Tofa Hon Laufo Fonotae Nuafesili Pierre Laufo:** Faafetai lau Afioga le Fofoga Fetalai e tasi a si au fesili...

**FOFOGA FETALAI:** Malie le Afioga le Minisita se i, ia te ofo foi au le le malamalama, la e manaia le tautalaga a le Minisita

**Tofa Hon Laufo Fonotae Nuafesili Pierre Laufo:** Ia,ona e leai o lau fesili e agai i tei ua ese le mea la e agai mai ai le Minisita, ese le mea lea sa ou talanoa atu ai o le tatou Open Skies Policy, sesi kamupani, e leai se tupe a le atunuu e alu ai pei o le mafuaaga lea, lea na ou taua tatou policy,

**FOFOGA FETALAI:** Le a le igoa o le mea?

**Tofa Hon Laufo Fonotae Nuafesili Pierre Laufo:** O le Open Skies Policy.

**FOFOGA FETALAI:** O le Open Skies lau afioga i le Minisita, ia malo.

**Tofa Hon LEATINUU WAYNE SOOIALO:** Lau Afioga le Taitai o le Itu Agai, se i uma tulai atu lau uo lea le Minisita of Aviation faamalalama le Open Skies, a o le taimi nei ia o lea ua iai e kamupani vaalele ua uma ona

ave iai e Samoa ia le tulaga lea i Open Skies ina ia mafai ai ona faimalaga mai iinei, e fesoasoani la le aveina tatou tagata i atunuu i fafo.

**Tofa Hon Olo Fiti Afoa Vaai:** Lau Afioga le Fofoga Fetalai...

**Tofa Hon Lauofo Fonotoe Nuafesili Pierre Lauofo:** Faafetai lau Afioga lea ua malamalama, Tai lava...

**Tofa Hon Olo Fiti Afoa Vaai:** E fiu e tau faamalamalama le Taitai o le Itu Agai e le malamalama.

**FOFOGA FETALAI:** Ia se i tulai mai le Minisita e faamalamalama atili le Taitai o le Itu Agai le mea na o le Open Skies.

**Tofa Hon Olo Fiti Afoa Vaai:** O le Open Skies lau Afioga, a ou pologa ifo e faamalamalama i aso uma aso uma, Open Sky o la e open le sky, ae le o i ai ma se vaalele po o se kamupani vaalele e fia agai mai ia tatou vagana ai le Quanta's ma le Virgin lea na matou omai loa faatoa omai lea o le lua e agai i Ausetalia, a o i i la i Niu Sila, o lea la e faatalitali po o ai se kamupani e fia sau aua lea ua open le sky a Samoa, ua e maua mai.

**Tofa Hon Lauofo Fonotoe Nuafesili Pierre Lauofo:** Faafetai lea ua maua atu le sese tele o le mea lea na e... ua leva a na lele le Virgin le va o tatou, manatua sa lele a le Virgin le va o tatou ma Niu Sila, mea la na sa i ai feagaiga ma tulaga faapena i lena vaitau, ia ae ua malamalama faafetai Leatinuu lea ua ou malamalama le open sky.

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia Minisita Galuega Tetele...

**Tofa Hon Olo Fiti Afoa Vaai:** E taunuu mai le faigamalo lenei, ua poloka e le group foi lea kau o le MALIT poloka i le 2019 lea ua toe tatala, ina ua afio mai lau Afioga le Taitai o le Itu Agai, lea ua toe tatala, lea faatoa toe open sky le mea lea ua i ai. O lua maua mai ma Lautafi le mea lea ou te talanoa atu ai?

**Tofa Hon Lauofo Fonotoe Nuafesili Pierre Lauofo:** Ia o le open sky ua leva na open, ia o lena...

**FOFOGA FETALAI:** Ia faaaau le saunoaga lau afioga le minisita.

**Tofa Hon LEATINUU WAYNE SOOIALO:** Ia pe open sky pe close sky, e \$104 miliona lava le gau, ae ou te fia oo lau afioga i le tulaga ona e i ai foi nai tusitusiga i le pepa i le tulaga o le siitaga o pasese o Samoa nei ma Tutuila mai Fagalii e leo iai se agaga o le Kamupani Vaalele i le taimi nei e toe autilotilo i se siitaga ae pau le mea lea sa faaopopo e iai le 65\$ o le latou airport tax o le malae vaalele lea sa aoina i le malae vaalele ao lea ua iai le aiaiga ia mafai ona toe ao e le Samoa Airways ma toe faaauau atu i le malae vaalele so o tusitusiga la sa fai ai lava se tusitusiga a le pepa latou ae lei fesiligia le Kamupani.  
Ona oomai foi lea i le tulaga o le isi tusitusiga e uiga i le pa o le pa'u o le vaalele ia mo le silafia foi e lau Afioga e lei pa se pau o le vaalele

**Tofa Hon Lauofo Fonotoe Nuafesili Pierre Lauofo:** Lau afioga i le Fofoga Fetalai faamolemole a mo se avanoa.

**Tofa Hon LEATINUU WAYNE SOOIALO:** Lau Afioga ou te le'o lauga ia Fonotoe aua e le i fesili ai.

**Tofa Hon Lauofo Fonotoe Nuafesili Pierre Lauofo:** Ia e pei o le mafuaaga lena o lo'u tulai atu o lea e te autilotilo mai ia te au, ou te le i lauga i se pa o se pau o se vaalele. Ou te le iloa la po o...

**Tofa Hon LEATINUU WAYNE SOOIALO:** O lea ou te lauga faalauaitetele i le tulaga lea aua ou te iloa sa e faalogo foi o talanoa ai...

**FOFOGA FETALAI:** O le mea a ia o lea ua manino...

**Tofa Hon Lauofo Fonotoe Nuafesili Pierre Lauofo:** Ia lau Afioga afai ua pa le pau o le vaalele ia ua tataua ona atugalu lau afioga i lena tulaga.

**Tofa Hon LEATINUU WAYNE SOOIALO:** Ia o lea foi sa ave le tuualalo foi le Samoa Airways aemaise foi le Pulega o le Samoa Airways i le tulaga lea e pei ona silafia, oloo iai le 4miliona a le tatou Malo e fesoasoani ai. E 4miliona le latou tupe mama ia e leai a la se eseesega ma le tala a le toeaina foi lea na fai i lona faletua ina ua ote i tamaiti ua taei ipu, toe oo foi i le isi aso taei ipu toe ote foi iai, ona fai atu lea o le toeaina i le olomatua aua e te ote soo, a taei ipu toe faatau mai nisi ipu. O le tulaga la lena o lea o le a iai e ave le fautuaga i le Samoa Airways a pa pau toe faatau mai nisi pau ina ia mafai pea ona alu le tatou vaalele, o le agaga lava lena o lea e taumafai atu iai e...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** E te le i lauga i se pau...

**Tofa Hon Lauofo Fonotoe Nuafesili Pierre Lauofo:** Ia ae leaga e pei o la e fautua mai i ai matou e toe faatau ni pau o le vaalele...

**FOFOGA FETALAI:** Leai o la e fautua i lana Pulega, o la e fautua i lana CEO, e le o fautua mai i se isi o le Itu Agai.

**Tofa Hon Lauofo Fonotoe Nuafesili Pierre Lauofo:** Lau Afioga silasila i ai po o pa pau o le vaalele ona o le maamaa lea na faaka ai e le afioga ia Olo le malae vaalele ua fai lava si rough tele o le mea le la ua i ai.

**Tofa Hon LEATINUU WAYNE SOOIALO:** Lau Afioga i le Fofoga Fetalai...

**FOFOGA FETALAI:** Ia faaaauau lau saunoaga, oi leaga o lea ua taua le Minisita o Vaalele.

**Tofa Hon Olo Fiti Afoa Vaai:** Se taimi ou talanoa sao atu laia i le tulaga lea, ae ou te leiloa i le Samoa Airways poo le a le mea e leai se faipau o iai, e faia pau o le vaalele, ae o le vaalele foi lea i lau vaai iai toetititi 30 tausaga e lei suia a pau o le vaalele o leai o se tupe e faatau ai ni pa'u.

**FOFOGA FETALAI:** Ia lea ua manino lea mea ae le o le malae vaalele ua 30 tausaga e lei iai se pa'u. Ia lau afioga i le Minisita faaaauau le saunoaga.

**Tofa Hon LEATINUU WAYNE SOOIALO:** O le fautuaga na avatu i le Samoa Airways lau afioga. Ae o le a tatou see mai i isi finagalo na aumai aemaise le faafaigaluegaina o tupe mai fafo i totonu o Samoa poo le tatou Foreign Investment sa fesiligia foi e nisi o Faipule. E pei ona silafia e lua Tulafono o lo o faatino ai le matafaioi a le Matagaluega o Pisinisi Alamanuia ma Leipa.

I le mataupu o le faafaigaluegaina o Pisinisi mai fafo. Tulafono o le Teu Faafaigaluegaina o Tupe mai Fafo po o le Foreign Investment Act 2000, oloo faaaauaina pea galuega i le iloiloaina o le tatou talosaga ua tuuina mai a tagata mai fafo poo Foreign Investors o loo fia faia ni latou pisinisi i Samoa nei a o lei tuuina atu i le Matagaluega o Tiute ma Tupe mo le iloiloaina o le laisene mo pisinisi poo Business Licenses.

Mo le silafia e faavae le iloiloaina o talosaga i lalo o le Tulafono lenei e faamautuina ai po o atinae agavaa a o le i tuuina iai se tusi faamaonia po o le FIC (Foreign Investment Certificate). O le IFC e faamaonia ai le atinae o loo fia amataina e le'o lavea i le lisi faaleoleo po o reserves list ia a le tatou Malo oloo iai i le taimi lenei mai lisi faatapulaa (restricted list).

Lisi Faaleoleo, mai lisi faatapulaa poo lisi faaleoleo e ono ia ituaiga pisinisi ua faaleoleo e mo nao tagatanuu o Samoa e mafai ona latou faatinoina. O ituaiga pisinisi foi nei e le mafai ona faafaigalueina ai ni tagata mai fafo; Pasi ma le felauaiga o tagata lautele

- Taavale laiti laupasese(taxis)
- Taavale totogi faalisi (Rentals)
- Oloa faatau taitasi(Retailing of food and drink items)
- O ili laupapa poo (Solar Milling)
- Ia ma elei lau afioga

O lisi faatapulaa o ituaiga Pisinisi ia e mafai lava e tagatanuu mai fafo ona faatinoina ae ia faamalieina aiaiga ma tuutuuga ua lisiina. Faataitaiga;1

1. Faigafaiva Faapisinisi, 40% sea ia umia e le tagatanuu mai fafo, 60% le sea e umia e le tagatanuu o Samoa. O sea ia oloo faasino i le vaa fagota lau afioga
2. Oloa Gaosi: Nonu ma le Virgin Coconut Oil. Ia fai se faiga paaga faapisinisi ia tagatanuu mai fafo ma le tagatanuu mai Samoa
3. Vaega Tau Auaunaga poo Services: Tusi ata o fale, ia fai se faiga faapaaga faapisinisi ma se tagatanuu Samoa
4. Inisinia : Ia lesitala le Pisinisi i Samoa, pisinisi tau fausiaina o fale auala ma isi ia lesitala foi le pisinisi i Samoa
5. Pisinisi Tau le Faamamaina o Otaota vale poo Sewage, ia fai se faiga paaga faapisinisi ma se tagatanuu Samoa
6. Faamamaina o otaota lafoai: Ia fai se faiga paaga faapisinisi ma ni tagatanuu foi Samoa
7. Pisinisi Tau Tumama ma isi Auaunaga feotai: Ia fai se faiga paaga faapisinisi ma ni tagata Samoa poo le Sanitation Similar Services

O le tusi faamaonia o le FIC ua nao se faamaoniga ae le'o se pisinisi o lavea i atinae oloo faaleoleo poo faatapulaaina i lalo o lea Tulafono. O lenei IFC e manaomia e le Matagaluega o Tiute ma Tupe Maua mo le latou iloiloga ao lei tuuina atu laisene o pisinisi e aloaia ai le sea pisinisi i totonu o Samoa nei.

O loo faaauauina asiasiga a le Matagaluega mo le faamautinoaina oloo usitaia e pisinisi aiaiga uma oloo faapea foi galuega fai faatasi a le Komiti galulue, oloo auai Matagaluega nei, o le Matagaluega o le Palemia, Matagaluega o Pisinisi Alamanuia ma Leipa, Matagaluega o Tiute ma Tupe Maua. O le galuega a lenei Komiti o le galulue faatasi lea e tulimataia ma mataitu galuega faatino a pisinisi oloo umia ma faafaigalueina ai tagatanuu mai mai fafo. Ia faatino galuega asiasi i pisinisi o loo maua mai i Lipoti o loo faafaigalueina ai tagatanuu mai fafo i pisinisi faaleoleo pe ua maua foi o faafaigaluega ai tagatanuu mai fafo ae leai ni pemitā faigaluega.

E faapea foi mo laisene pisinisi, o Tulafono o tagatanuu i le Teu faafaigaluegaina oTupe mai Fafo, poo le Citizenship by Investment Act 2015. Talu ona amata faamamaluina lenei Tulafono ua molimauina e leai se tasi

ua aloaia se talosaga e faamatuu atu iai se talosaga o se tagatanuu moni o Samoa, ae ona o aiaiga o lenei polokalame ma le Tulafono, ua taulimaina foi e le matagalueag ni faafesili foi faapea ma ni talosaga e fautuaina ai le Malo le mafuaaga e le'o mafai ai e Samoa ona maua ni talosaga i lenei Polokalame. Ia ua valu tausaga mo le silafia e le tatou atunuu e lei faatinoina lava e se tasi lea Tulafono ina ia mafai ona nofo mau ai i Samoa, faapea ai foi ma talosaga ina ia toe teuteu le Tulafono lea ua iai le fuafuaga a le tatou faigamalo i le taimi lenei aemaise a'u nei o le Minisita e toe tagai lelei iai le Matagaluega ina ia toe fai ni iloiloga ma toe teuteu se tatou tulafono e maua ai e Samoa ni talosaga mai iai latou e fia auai i lenei polokalame.

O le tulaga ua iai nei le faatinoina o lenei polokalame, mo le silafia ua pasia e le Kapeneta le amata ona toe iloilo lenei Tulafono ma ua faagasolo tapenaga a le Matagaluega mo le faatinoina o lenei galuega. O lona uiga e iai e taimi e oomai ai le tatou Tulafono pe a faapea ua uma ona iloilo ina pe a uma lea ona pasia mai e le tatou Kapeneta.

Ia lau afioga i le Fofoga Fetalai ona ou oomai lea i tatou Galuega Faavaitaimi.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai.

**FOFOGA FETALAI:** Ia malie lau Afioga i le Minisita sei tuu atu le avanoa i le Sui o Vaimauga Nu 1.

**Afioga Sulamanaia Fetaiai Tauiliili Tuivasa:** E pei o lea ua malele sa'o a le Minisita i mea sa taua i le lauga a lenei Itumalo, faafetai a i lau afioga i le Minisita e pei o le agaga tonu lena reserve list, e pei e le'o se po se lilo pe a tatou autilotilo nei i faleoloa e pei o le popolega lena i lo'u Sui, o lea e manino e le mafai ona fai se retail ia ae ua tatou vaai i afioga ma nuu la ua iai, sei tulou a, ia ua fai e tagata Asia nei faleoloa ia, ao latou, ia lea a e manino i lau saunoaga, pei o le popolega na lea na avatu ai, lua o le tele foi o Car Dealers le i totonu o tagata nuu mai fafo, ua fai foi latou rentals ao le reserve na o lea e malu puipua i lalo le reserve list lea, lea na e tolaulauina, lua o le foreign investment, faafetai tele pe a iai se tulaga e tau toe vaai iai, o le popolega o lenei itumalo, sei tatou vaai a isi o tatou atunuu faleoloa, sei tulou a nai tagata Asia, lea na omai le tulaga faapena le aumaiga e faamatuu iai laisene, as a Wholesale, ae ua uma ifoga toe apalai e auma ma tagata faigaluega ia, ona o lea galulue faatasi lau matagaluega ma le matagaluega o palemia, e faamatuu mai avanoa e toe omai a latou,ao le tagata a lea, le saina lea sei tulou a, le Asia lea, o ia e ona le faleoloa, o ia e ona le fale, ae lea ua toe omai ona tagata mai fafo, e le umi a ae tatou vaai atuga sei tulou, ua nonofo ma se teine Samoa pe nonofo ma se tama Samoa, ae uma ifoga, sei tulou a lenei maota, o la e iai a lona toalua i o, le umi ae vaai atuga faatoa

aumai sao loa, popolega na lea e iai le sui, ae o le tulaga na lau Afioga le Minisita sa popole iai, ona o le Foreign Investment, e 100% a e omai a latou own ona o le tulaga i le tatou faigamalo, ae o lea ua, o mea lea sa e saunoa ai o le agaga tonu a lena, ia mafai ona omai latou, e le mafai na omai loa pe as a Wholesale pe a, ia iai a pasene o tatou tagata nuu, e faapaga iai lana iai, o mea ia sa e laulau maia isi vaega na o atinae, e mafai a na sau le saina la e sei tagai Asia lae i fafo, sau fai sana Wholesale inei e 100%, e faafefea la tatou tagata nuu, lau Afioga le Fofoga Fetalai ia pei o le mea na e popole ai, lua o le mea na i tagata ia e aumai, e o mai le tagata e tasi e sau e fai le pisinisi, ae umaga,ua aumai atoa ma lona aiga, ona o le a, fai mai e le maua inei i Samoa le tulaga lea, ae le mea(13.09), na o le omai e faatau le oloa, fai mai e le maua le tagata lea, ia ona meet loa lea o requirement lea e faasalalau faapena ae umaga, e amai tagata la ei fafo, pei o le agaga na e avatu ai, ona lea e vaavaalua ouluga ma le matagaluega o issue ga o pemitia ia e popole a le Vaimauga i le soona o mai o tagata, ae lea maua avanoa nai totonu, i totonu o le tatou atunuu, lau Afioga le Fofoga Fetalai, pei o sina toe...

**FOFOGA FETALAI:** Ia lea ua maua le finagalo o le sui mamalu, ia lau Afioga le Minisita.

**Tofa Hon LEATINUU WAYNE SOOIALO:** Ia faafetai atu lava i le sui usufono foi o Vaimauga, ia e ese ma le lelei o ana masalosologa, ae out e talitonu, e taua foi masalosologa ia lau afioga, ona o loo faafofoga mai le matagaluega, a faapea o iai ni mea faapea o tutupu o lona uiga e leo work lelei la le system lea e faaoga le taimi nei, ae mo lou silafia, sa ou tapa le matagaluega i pisinisi ia o loo, pei ona e saunoa ai, o loo, pisinisi mai Asia, ae peitai la e lesitala uma i lalo o Samoa o lona uiga, ia pei la out e faasao ail au saunoaga, ia e amai ia tagata Samoa e lesitala ai le pisinisi lea, ia ae o tua le pisinisi na e iai le saina, lea la ua iai le fuafuaga foi a le Matagaluega a Tiute, ina ia toe tilotilo iai i laisene ia, lea la o loo iai le tulaga lea na faatino nei e le Afioga o Minisita o Tiute ma Lafoga, ina ia taumafai e aumai uma, poo ai uma o i latou, e ona nei pisinisi pei ona ou tolaolao atu i le taimi ua tuanai, o le faiga na o loo fai ai le taimi nei, oloo apply mai foi ia tatou kamupani Saina ia o loo omai nei, aemaise la ia kamupani ia omai lalo konokarate a le Malo poo lalo tatou tai pei o le tulaga lea o loo faatino ai nei le tatou uafu. O lo o aumai lava latou talosaga e amata atu a i immigration na sau ai laia i le MCIL seiloga lava ua atoatoa aiaiga uma e pei ona manaomia i lalo le tatou Tulafono. Ae faafetai lava mo le taugologolo lea faafofoga mai le Matagaluega o loo alu lava asiasiga. Ua iai foi nisi mea ia ua maua e lenei taimi e le Matagaluega i tulaga ia e maua atu isi ia latou mai lava mai Asia, o lo o faigaluega i isi pisinisi i tua ae leai ni pemitia.

O lea foi ua uma ona faatonuina ma toe faafoi atu latou i fafo pea iai se tulaga faapena, ao lenei taimi ua ou oo mai le tulaga o Galuega Faavaitaimi.

Lau Afioga i le Fofoga Fetalai i le tulaga o tatou galuega faavaitaimi e pei ona taua i le taimi ua tuanai, o lea ua uma ia aiaiga foi ma faatalanoaga a le soa komiti foi a le Kapeneta na iai mo le iloiloina o ni faavae fou, aua le faatinoina o le tatou galuega faavaitaimi.

Ia faafetai mo finagalo sa laga aemaise lava le tulaga i tiute o Komiti o Itumalo Faavae, i tulaga o galuega faavaitaimi. O le agaga lea iai le tatou Matagaluega foi ma le tatou Faigamalo lenei taimi, ina ia aafia mai ai ia Ofisa ia o Itumalo i tua, ae le mafai ona tatou faia le tulaga lena pea le faia nei Faiga Faavae ina ia mafai ona talia lelei ai ia Itumalo aemaise foi o Ofisa o Itumalo i tua.

Mo le silafia o lo o faagasolo le galuega a le Komiti a le Kapeneta mo le faamautuina o le tapenaina o faiga faavae mo galuega faavaitaimi, aua se faaiuga faaiu o le Kapeneta . O lea faailoa manino tulaga uma pea maea ma mautu le faiga faavae, o le agaga maualuga o le Malo ina ia mautu fuafuaaga ma tapenaga aua le puipuiga o le soifua o tagata faigaluega faavaitaimi . O le agaga lava o lenei faiga faavae lau Afioga i le Fofoga Fetalai mo le puipuiga o tatou tagata faigaluega o loo o I fafo. O ia vaega e aafia ai nofoaga e faamautu ma tulaga uma lava o galuega faavaitaimi mo sui o Samoa o loo galulue i galuega.

E le gata i lea o nisi atugaluga o lona aoatetele e aafia ai le lava o tagata faigaluega mo pisinisi o Samoa, e pei foi ona faasea mai ai le vaega tumaoti, e saolele lava o loo matou maua lava ia faasea foi a tatou pisinisi maoti iinei Samoa ona o latou tagata faigaluega. E faatupulaia o le aofai o tagata ua auina atu fafo , faatasi ai ma latou ua iai tomai faapito ma agavaa e taua ma e aoga mo le atinaeina o Samoa.

E pei ona silafia o lenei galuega faavaitaimi e tatau ona agavaa iai latou ua 6 masina e le faigaluega. Ao le complain lea sau le taimi lenei , e faigaluega nei ae maua atu ua alu taeao , o lea ua iai le fuafuaaga foi o le tatou Faigamalo i le faiga faavae lea , tilotilo ni auala e mafai ai ona Iloilo ina ia taofia ai le tulaga lea ia aua nei toe tupu mai.

E faigata ona tauva tatou totogi a pisinisi Samoa ma totogi o loo ofoina mai e pisinisi Ausetalia ma Niu Sila , e vava mamao le tatou \$3.50 ma le \$28.00 AUS le minimum wage so tasi lena tulaga le siitia o le faalagolago o Samoa i lenei polokalame mo la latou tamaoaiga ua faatuatuaina ai lava le galueaina o laufanua ma laueleele aua le tamaoaiga o loo maua ai lava totonu lava o si o tatou atunuu.

E tumau ma faaauauina pea ona tuuina avanoa faigaluega i tagata masani a le faasafua i tua mo isi tagata o loo fia maua ni avanoa, ia ua omai tagata faigaluega ave avanoa a tagata e leai ni galuega ma tagata e leo faigaluega. Lea la ua iai le aiaiga faapena e pei ona silafia foi . O lea ua amata demand e le tatou Matagaluega mai MCIL ia le lipoti mai le NPF, poo faigaluega nei tagata ina ia iloa ai o tagata nei ua ave o tagata o lae faigaluega. O le agaga lea o le tapena ai o le faiga faavae mo galuega faavaitaimi . Ma e faamoemoe

e avea ma se taiala manino e limataitaiia ai tiute ma matafaioi a Matagaluega ma ana paaga uma ae iai foi ni suiga aemaise o le faaaogaina o Komiti Faaitumalo Fono Faavae.

O lea faaauau ai lava ona galulue faatasi le Fono Faavae ma le Matagaluega ina ia sologa lelei pea le faamuamua e taua, o nisi nei o fuafuaaga o lea ua faagasolo iai mo le silafia. O lea ua faaopopo a tatou Ofisa Sooupu poo tatou Liaison Officers i Niu Sila ma Ausetalia, pei na silafia sa tai tasi na iai , e tasi Niu Sila tasi Ausetalia o lea ua tai lua. Ua lua Niu Sila...

**FOFOGA FETALAI:** Ua ou vaelupeina le saunoaga a lau Afioga i le Minisita ae talitonu foi ua tatou oo i le tatou taimi malolo e tusa ma le lafo, o le mea lea e manatu ai o le a faaauau lau saunoaga pe a tatou taliu mai le tatou malologa pe a ta le itula e 6 tatou toe amata ai.

*Na faataatiaese Taualumaga a le Fono Aoao Faitulafono i le itula e 5.00 i le afiafi.*